

CODINTO YACNOCQUIDON ISTE I

Pabadon Codinto yacnocquidon iste dada uaid

1 ¹Pabado nebi. Nuquin Papa
bunacpadomboen Esuquidistun ëbi
chuibenequid icta cac nebi.

Esuquidistu tantiaquidbidi, Sostenes,
nuqui con utsi caid ëbëd iquec. ²Aidbëd
icquimbi Esuquidistu tantiec
iccuadedquido mibitedi chuiquin dada
uaimbi. Matses icsaquid icsho
cuidnushe quiash abided ciudadec
Esuquidistu unëspanëdash quequin
abimbo tantiaquid yec Nuquin Papan
cuëmbanaido mibitedi nec quequin
mibitedi chuiquin dada uaimbi. Nuquin
Papan bëdambo icmenu caido mibitedi
nec quequin dada uaimbi. Abi
tantiaquid utsibobëd abi tantiaquid
nuquitedi nec.

³Matses icsaquid icsho cuidnushe
quiash abided ciudadec Esuquidistu
unëspanëdash, quequin abimbo
tantiasho isun Nuquin Papan
bëdamboen isaidquio nuqui nec.
Adquido yec utsibobëd bëdamboec ma
tabadpanuna.

Mibi tantiaquin Nuquin Papa chuided-chuidedaimi

⁴Mibi tantiaquin Nuquin Papa naden
chuided-chuidedaimi. Matses icsaquid
icsho cuidnushe quiash abided ciudadec
Esuquidistu unësaid chuibanac abi
tantiaquido Codinto yacnocquido

yanacsho bëdambocquidbimboecnuc
mimbi isec, quec bëdambo iquebi, Papa,
quequin chuided-chuidedaimi. ⁵Aden
Nuquin Papan bëdamboen isaido icquin
ambi bëdamboen tantiamiaidobidi
mibitedi nec. Matses icsaquid icsho
cuidnushe quiash abided ciudadec
Esuquidistu unësaid mibi Nuquin Papan
tantiamiac nëbi mibitedi bëdamboec
tabadquin Esuquidistu chuibanac.

⁶Esuquidistu tantiesabo iccondaidi
ëmbi Esuquidistun naid chuibanac
tantiaquid mibitedi yanondac. Adquido
yanash bëdamboec tabadquin ismequido
mibitedi nec. ⁷Adquido yec Esuquidistu
choate caimbudec Nuquin Papan abi
bëdamboec tabadaid tantiamiaibi iccoshi
quetiapimbo mibitedi iquec. ⁸Aden abi
bëdamboec tabadaid tantiamequin
Nuquin Papan mibitedi chieshenquo
icmec ma Esuquidistupadquid icnu
quequin mimbi caimbudacpadquio
icpanuna aid padpidec choanuc.
⁹Adquid mibitedi icmequin ambi
Esuquidistubëd icquido icta caido ambi
cuëmbanaido Nuquin Papan mibitedi
icmiac. Adoshon mibi badedquio
Esuquidistupadquid yanenquiocsho isun
chieshebi, qesa Nuquin Papa icquin abi
mibitedi bëdambocquid icmebanec.

Esuquidistu tantiaquid cuëshëdacbimboec chushcananquido

¹⁰Adembidi chuinu. Tantiata.
Esuquidistu tantiaquid nebi quec

Nuquin Papan bēdambo icmiaid
ēnacimboc tabadenda. Adec tabadec
Esuquidistu tantiaquid utsitedi
tantiananec ma cuēshēdacimboc
chushcananese yampanuna.

¹¹Esuquidistu tantiaquido Codinto
yacnocquido chushcananec quec. Chido,
Quēdoen shubunoēsh choquido nēmbo
ēbi isec choshon aden chiec. ¹²Mibi
onquiaid chuinu. Tania. Pabadon
tantiamiaid nebi, quec
chushquiacimboc utsi-utsiec
tabadnubien; Apodosēn tantiamiaid
nebi, quec chushquiacimboc
utsi-utsiec tabadnubien; Petedon
tantiamiaid nebi, quec
chushquiacimboc utsi-utsiec
tabadnubien; Esuquidistun tantiamiaid
nebi, quec chushquiacimboc
utsi-utsiec tabadec.

¹³¿Esuquidistu tantiaquido
cuēshēdmenuenda ēbipadquidon
chuibandiondash? Padenquio. Naden
chuinu. Tania. ¿Mates icsaquid icsho
cuidnushe quiaish ēbida cuidadec
unēspanēda? Padenquio. Adembidi
¿Esuquidistu tantiaquid nebi quequin
ēbi mimbi chuishodambi mibitedi acten
mentobandionda? Padenquio.

¹⁴Esuquidistu tantiaquid icsho
Quidispobēda Cayo aid daēdtsēqui
naondambi quec tantiec tsadebi. ¹⁵Utsi
padenquio iccondambi ma Pabadon ēbi
acten mentondacsho aid tantiaquid
nebi, quetiapimbo ma mibitedi
icpanuna. ¹⁶Ai, Estepanasēn shubun
icquidobidi acten mentondambi.
¿Utsidambi acten mentoponda?
Padenquio iccondambi. ¹⁷Ēbi
tantiaquido acten mentoban,
Esuquidistun cainquio yaqui Matses
icsaid bedshunec abided cuidadec
Esuquidistu cuesten dectanac
unēspanēdash quequin chuibeneta,
Nuquin Papan cac aden chuibenec nebi.

Ēmbibi tantiaid chienquiocquin ma
mates icsaquid icsho cuidnushe quiaish
abided cuidadec Esuquidistu cuesten
dectanac unēspanēdash quequin ma
utsibontsen tantiapanu queshun
chuibenec nebi.

Esuquidistu abitedi tantiaquidquio nadatiambocquin nabanquidquibidi

¹⁸Nuquin Papabēd icquido icmenuec
mates icsaquid icsho cuidnushe quiaish
abided cuidadec Esuquidistu
unēspanēdash quequin chiac, ¿Adpecta
iquec? quequin tantiesa yec Nuquin
Papa yacno puduedtiapimbo iquec.
Adec adquido onquenubi nuquien
Nuquin Papa yacno puduedtequido yec
Nuquin Papan nadatiambocquin nac
mates icsaquid icsho cuidnushe quiaish
abided cuidadec Esuquidistu
unēspanēdash quequin tantiec. ¹⁹Abi
yacno puduedtemaido chuiquin Nuquin
Papan dada uamiampid nad iquec:

“Comapenen tantiaquidon ambibi
dadpen tantiaidtedi ēmendambi.

Adquidon tantiatiapimbo
yacpadembi natiamequin
nabanendambi,”

quequin Nuquin Papan dada uamiampid
aidēmbi nēbi naid nec.

²⁰Esuquidistu tantiesa ambibi
tantiaidtedi naimēdan ¿mitsimbo
adquido tabadpec? ¿Nidaid abubēd
aidēn icquidtedimbo mitsipadquidquio
icpec? quequin isbanquin, Nadquio
icpec, quequin comapenen adquidēn
tantiec. Aden tantiashic ambi tantiaid
Nuquin Papan ēmiac ¿mitsimbo
adquido tabadpec? ¿Midaquidēn
bēdamboen tantieque? Adquidēn
tantiaid tantianu, quec
onquecuededquid ¿mitsimbo tabadpec
Nuquin Papan aidon tantiaid ēmiac?
Adquidon dadpen tantiaquimbi mates
icsaquid icsho cuidnushe quiaish abided

cuidadec Esuquidistu unëspanëdash, quequin utsin-utsinquien tantiauidec. ¿Adsho isun Nuquin Papan abi yacnoda puduedmepadec? Padenquoio iquec.

²¹Nuquin Papan nadatiambocquin nac matses icsaquid cuidnushe quiash abided cuidadec Esuquidistu unëspanëdash quequin chuisho ambibi dadpen tantiaquidon tantiauidec. Ëmbi tantiaidpenquoio tantiatipibi quequin tantiatipimbo iquec. Adquido tantiatipimbo icnubi ëbi yacpadquidon Esuquidistu chuibanac abi tantiaquid utsibo yanec. Nuquin Papa yacno puduedtequidtedi adquido nendac.

²²Adquidon aden tantianubi Nuquin Papan nadatiambocquin nabantequid iste bunquin isadaidbon tantiauidec. Quidieco matsesëmbien, Ëbi ënden tantiec papuduedaid daëd uanu queboedëmbi Nuquin Papan chiaid tantiauidoaic. ²³Adec tabadnubi matses icsaquid icsho cuidnushe quiash abided cuidadec Esuquidistu cuesten decnanac unëspanëdash, quequin ëbi yacpadquidon chuibanoaic. Adoquien, Nuquin Papan chomiaid nec, quequin isadaidbon cuesten decnanenquioctsenëdash, quequin tantienquoio yec tabadec. Isadaidpembo, Esuquidistu mimbi chuiboed ëmbi tantiapadpenquoio iquec. Adoac mimbi Esus chuibanaid ëmbi ënden tantiaidbëdda daëd uatiapimbo iquebi quec tabadec. ²⁴Adquidon tantiauidnubi isadaidbo utsi-utsiec adecbidi isadaidpembo utsi-utsiec Nuquin Papan cuëmbanaido icquin naden tantiec: Nuquin Papan tantiampicpadquiequi matses icsaquid icsho cuidnushe quiash abided cuidadec Esuquidistu cuesten decnanac unëspanëdash. Aidi matses icsaquid icsho cuidnushe quiash abided cuidtequid icmequin Nuquin Papan nadatiambocquin naid nendac, quequin

nuqui tantiec. ²⁵Abitedi tantiaquidquo icquin ambi abentsëc tantiatsaid Nuquin Papan chiac dadpen tantiaquidën dëniactiapimbo iquec. Adecbidi, Nuquin Papan nadatiambocquin nainquiocquin bëdiactsëc natsëcnubi adomboen tantiaquin matsesën dëniactiapimbo iquec.

²⁶Utsibo, ¿mitsipadquidquo mibi icponda? Nadquid mibi icpondaque. Chuinu. Tanta. Daëdpactsëc tantiatsëcquido mibi icpondac. Namequidpenquoio mibi icpondac. Chuiquid dapan bacuëpenquoio mibi dadpen icpondac. Adquid icsho Nuquin Papan mibitedi tantiaquin, Con bacuë caid nec, quequin mibi cuëmbanondash. ²⁷Ai, daëdpactsëc tantiatsëcquido Esuquidistu tantiaquido icsho Nuquin Papan cuëmbanaido mibitedi nec. Adquid ambi cuëmbanaido icnubi dadpen tantiaquid iquequi Esuquidistu tantiesa icsho Nuquin Papan cuëmbantemaid nebi quequin tantiec natiaic ma shubiquiopanuna.

²⁸Adembidi utsibon tantiauidtsaido Nuquin Papan cuëmbanaido neoaic. Adecbidi, ¿Ada matses utsi iqueque? Isnu quenquiocquin matsesën tantiambo yaid Nuquin Papan cuëmbantequid icnuc ²⁹ëmbi comapenen tantiaquin nabansho Nuquin Papan cuënoshi quequin matsesën chuitiapimbo iquec.

³⁰Nuquin Papan tantiamiac Esuquidistu tantiaquid mibitedi nec. Abipadquid Nuquin Papan Chomiaid Esuquidistu yec abi tantiaquidtedi Nuquin Papa bëdamboec tabadaid tantiamequid nendac. Aidi Nuquin Papan chomeshun matses icsaquid icsho cuidnushe quiash abided cuidadec unësaid isun Nuquin Papan cuidtiapimbo nuqui iquec. Icsaisa icsho Nuquin Papan aid bëdamboen isquin adomboembidi nuquitsen isoaic. Adecbidi, aidi abi yacno bëyucanec

puɖuedash tsadacpadec adecbidi nuquitsen tabadoaindac. ³¹Aden nuqui tantiaquin Nuquin Papan dada uamiampicpaden, Ēbibi bēdambo ictiapimbocquid icscho mimbi bēdambo icmiaid nebi, Icbo, quequin ěmbi naid chienquiocquin Esusēn naidquio chuiبانuna nuquitedi.

2 ¹Adembidi chuinu. Tanta. Mibi yacno nidshun dadpen tantiembi quenquiocquin daēdpactsēqui cuembo chuiبانondambi. ²Esuquidistubēdta abi cuesten dectanaid chuinu quequin aiduidi mibitedi chuiبانondambi. ³Codinto yacnocquido dacuēdampambo iquec quequin uēdēequimbi mibi chuiبانondambi. ⁴Ēmbibi dadpen tantiacpadomboen chuiبانenquioccombi. Nuquin Papan Mayanēn tantiamiacpadomboen ěmbi chuiبانubi aidēmbi nadatiambocquin mibitedi tantiamiondash ⁵ma Pabadon tantiamiacpadomboen tantiamioshi, quetiapiombo mibitedi icpanuna.

Nuquin Papan Mayanēn tantiamiaid

⁶Nuquin Papan tantiamiac comapenen tantiaquin ěbi yacpadquidon chuibanoaic. Aden chuiabeniac Nuquin Papan chiaid tantiabenec papuɖuedquidon bēdamboen tantiec. Aden Nuquin Papan ěbi yacpadquid tantiamiaido matsesēn ambibi comapenen tantiacpaden chuiبانesambo nuqui nec. Adembidi matses chuiquid dapabon comapenen tantiacpaden chuiبانesambo ěbi yacpadquido nec. Matsesēn dadpen tantiaid uesadendac. ⁷Adnubien Nuquin Papan comapenen tantiaquin, Esuquidistu chuiбенета, quenquiocpampidēmbi nēbi, Chuiбенета, cac Esuquidistu ěbi yacpadquidon chuiبانec. Ushē uabi tabadquin matses bēdambo icmequid con mado nendac, quequin Nuquin Papan tantiapampic.

⁸Esuquidistu nuqui bēdambo icmetequid Nuquin Papan chomiacsho adquid nec quequin chuiquid dapabon tantienquiocpanēdash. Aidon, Nuquin Papan Chomiaid Esuquidistu nec, quequin abimbo tantiaquin cuesten dectanenquio ictsenēdash. ⁹Aidpadquid chuiquin Nuquin Papan ěndenquimboshē dada uamiampid nad iquec:

“Nuquin Papan abi tantiaquido ambi cuēmbanaido abi yacno tabadmenun nacnenaid bēda tantiesan istiapimbo iquec. Adecbidi Nuquin Papa yacno nadquio ictsias, quetiapiombo matses iquec.”

¹⁰Adnubien Nuquin Papan Mayanēn Nuquin Papan abi yacnoshon bēdamboec tabadte nacnenaid iquec quequin nuqui tantiamiac.

Nuquin Papapadquid aton Mayan icquin Nuquin Papa tabadacpadquiec tabadaid nuqui tantiamioaic.

¹¹Matsesēn ambi tantiacpaden chiabi yac utsin tantienquio iquec. Adembidi Nuquin Papan ambi tantiacpaden chiamboecnoc matsesēn tantiatiapimbo iquec. Abipadquid aton Mayanēnuidquio tantiec. ¹²Con mayan ěbipadquidquio menenu quetiapiombo matses iquec. Nuquin Papambien abipadquid aton Mayan nuqui menec ma aidēnquio abi yacno bēdamboec tabadaid nuqui tantiamepanuna. ¹³Aden aidēnquio tantiamiac adomboembidi ěbi yacpadquidon chuibanoaic. Ēmbibi tantiacpadpenquiocquin Nuquin Papan Mayanēn tantiamiacpadomboen chuiبانembi. Adomboembidi ěbi yacpadquidon chuibanoaic. Aden Nuquin Papan chiaid chuiبانac Nuquin Papan aton Mayan meniaidon tantiaquiec. ¹⁴Nuquin Papan abipadquid meniamaidon aidēn chiaid tantiatiapimbo iquec. Aden Nuquin

Papan Mayanën chiaid tantiatiapimbo icquin Nuquin Papan matses bēdambo icmenu queshun Esuquidistu chomiac matses icsaquid icscho cuidnushe quiaish abided cuidadec cuesten dectanac unēsānēdash quequin aidon tantiatiapimbo icoaic. Ēmbi tantiacpadomboen Nuquin Papan chienquio iquec, quendac Nuquin Papan abipadquid meniacmaido. ¹⁵Nuquin Papan Mayanën tantiamiaidombien naden utsibo tabadaid tantiec. Matses bēdamboec tabadsho isun, Nuquin Papan Mayanën tantiamiacpadec tabadquidquio nec, quequin nuqui tantiec. Adembidi utsi icsamboec tabadsho isun, Nuquin Papan Mayanën tantiamiacmaido nec, quequin nuqui tantiec. Nuquin Papan Mayanën Nuquin Papan chiaid tantiamiacmaido nuqui naic tabadaid isash Nuquin Papan chiacpadquieq tabadquid nec quetiapimbo iquec adquid. Adecbidi Nuquin Papan chiacpadpenquio yec tabadquid nec quetiapimbo Nuquin Papan Mayanën tantiamiacmaido iquec. ¹⁶Nuquin Papan chuimiampid nad iquec: “Nuquin Papa Abia Yampid yec abitedi tantiaquidquio nec. ¿Adquid Nuquin Papa icscho abi chuiquin ismequid mitsicquid icpec? Adquid nibēdec.” Nuquin Papan tantiacpadomboen aton Mayanën tantiamiaido icquin Esuquidistun tantiacpadomboen nuqui tantianec.

¿Esuquidistu tantiaquid utsi icsambo iquec, quecta ique?

3 ¹Adembidi chuinu. Adembidi tantia. Mibi yacno tabadquin Nuquin Papan chiaid tantianenabicquid mibitedi icscho daēdpactsēc chuibanondambi. Codinto yacnocquido

bacuē uidēnabi yacnimboecquido nec queshun Nuquin Papan chiaid daēdpactsēc mibitedi chuibanondambi. ²¿Nēbi tishaidēnda pambid pepec? Padenquio. Mibitedi adquidbimboecsho tantienquio icnushe queshun Nuquin Papan chiaid daēdpactsēc chuibanondambi. Ēnden iccondacpadquibi mibitedi adquiobidi icoapēc. ³Esuquidistu tantiesha yec tabadondacpadec mibi tabadoaic. ¿Esuquidistu tantiaquid utsi icsambo iquec, quecta ique? Nuquin Papan Mayanën tantiamiacmaido padquid yec nēishec chushcananec mibi. ⁴Pabadon tantiamiaid nebi, quec utsi-utsiec chushquenubien; Apodosēn tantiamiaid nebi, quec chushqueoai utsi. Adeq chushquec Nuquin Papan Mayanën tantiamiaibi yacnimboecquido mibitedi nec.

⁵¿Mitsipadosho mimbi ēbi isponda? Adembidi, ¿Mitsipadosho mimbi Apodos isoaponda? ¿Ēmbembidambi mibi chuibamponda? ¿Ambembida Apodosēnsen chuibampanēdash? Padenquio. Tantia. Chuinu. Nuquin Papan chiacpadomboen Esuquidistu chuibenequid ēbi daēdi nebi. ¿Pabadon chuibanubi Nuquin Papan Esuquidistu tantiamiondashi quequinda mibitedishun tantiape? Ai, ēmbi adobanubi Nuquin Papan Esuquidistu mibitedi tantiamiondash. ⁶Tiedēn caniquid ēshē siabi yac dēyuctiapimbo yacnimboecquid icquin Codinto yacnocquido Nuquin Papan chiaid dadpen tantiatiapimbo iquec, queshun matses icsaquid icscho cuidnushe quiaish abided cuidadaid Esuquidistu nec quequin adquid chiaidba mibitedi chuibanondambi. Yuecash Apodosēn mibi yacno chopanēdash. Adeq choshon tiedēn caniquid dēyuctsash tanunquiocnoc canitiapimbo

yacbimboecquido Codinto yacnocquido icnushe qeshun Apodosën chuibanoapanëdash. ⁷Tied nitsinshun taneshcain tiedën caniquid canimesa icbo nec. Adquiobidi Nuquin Papan chiaid chuibanquid mates tantiamesa nec. Nuquin Papambien tantiamec. ⁸Tied icbon con tied nitsinec cho cac nashunec. Aden nabanquin nainacsho icbon abi nitsinshunquid cuidec. Adembidi con tied taneshcaic cho cac nashunoaic. Adembidi abi neshcashunquid cuidoaic. ⁹Nuquin Papan chiacpaden Esuquidistu chuibenequid Apodos nendac. Adembidi Nuquin Papan chiaid chuibenequidtedi nec. Adquid ëbipadquid icnubi Nuquin Papan tiedbimboecquid mibitedi nec. Nuquin Papan shububimboecquidbidi mibitedi nec.

¹⁰Nuquin Papa tabadte shubu uashunun buintad teshun abia tabëcacbimboen Esuquidistuba chuibanondambi ma matsesën tantianueshun. Buintad tabëcacbimboen Esuquidistu ëmbi chuibanan utsibon adomboembidi aidbidi chuibeneoaic. Bëdamboen chuibenenuquin ¿Nuquin Papan tantiacpadomboendambi chuibaneque? Tantianu, qeshun Nuquin Papan chiaid isted-istedtiad ambi chuibeneta caidon. ¹¹Shubu uashunquidën shubu uidën uatequid nitsinan shubu uashunquid utsibo adomboen tabëcoanu quesa nec. Adquiecbidi Nuquin Papa tabadte uashunu qeshun buintad tabëcacbimboen Esuquidistu ëmbi chuibanan adquid nec, quequin utsi chuibantiapimbo utsibon iquec. ¹²Buintad tabëcaid tabadacbmboecquido icmenuequin Nuquin Papan chiaidquio abimbo chuibanoaic. Utsimbien abipenquiocnoc chuibanoaic. ¹³Adashien yuecash

Esuquidistu choanuc ¿Ëbi chuibanquidën ëmbi chiacpadomboenda naoshe? Nëdëncadoquin tanu, quependac. ¹⁴Aden nëdëncaquin tanac Nuquin Papan chiaid bëdamboen chuiquidon chuibanac Esuquidistu tantiaquidombo yec buintad taudacmaid nidacbmboec abi nidendac. Adsho isun abi bëdamboen chuibanquido Nuquin Papan menetequid nendac. ¹⁵Adomboembidi utsibon abipenquio icnuc chuibanac Esuquidistu tantiatiapimbocquido taudaid bescashun secacbmboen secatequid nendac. Adnubi abipenquio icnuc chuibanquido tauidsenacbmboec abentsëqui ambi chuibanaido nibëdnuc Nuquin Papa yacno puduedendac. Adquido Nuquin Papan menetemaïdo nendac.

¹⁶Esuquidistu tantiaquido Nuquin Papan Mayan tabadtequid nec. ¿Adquid iquec Nuquin Papa tabadtequidbidi nebi quequin tantiatiapimboda mibitedi icpe? ¹⁷Ai, Nuquin Papa tabadtequidbidi mibitedi nec. Adquid icsho mibi icsabudmenuequido Nuquin Papan ënenquiocquin comapenen cuidendac. Abi tabadtequid Nuquin Papan cuëmbanaido ambi bëdambo icmebanaidobidi nec. Esuquidistu tantiaquido Nuquin Papa tabadtequid nec caindac.

¹⁸Adec abi tabadte yequi Esuquidistu tantiesan tantiacpadquiec mibi tabadec. Adec tabadec, Esuquidistu tantiaquid nebi, quec mibibi mua uadec. Esuquidistu tantiaquidquio icnuec Esuquidistu tantiesan tantiacpadec tabadenquiocquin Nuquin Papan tantiacpadomboen tantiaquiota. ¹⁹Esuquidistu tantiesan tantiacpadquiec tsadquidën ëbi yacno tabadte tantiatiapimbo iquec, quequin Nuquin Papan tantiec. Aden tantiaquin ambi

dada uamiampid nad iquec: “Ambibi comapenen tantiaquin nabanaid ënabi icnubi icbo unësëndac.” ²⁰Adecbidi: “Adquidën tantiaidbidi ënëdtequid nec,” quequin Nuquin Papan tantiec. ²¹Ad icnuc, Pabadon tantiamiaid nebi, quenda. Adecbidi, Apodosën tantiamiaid nebi, quenda. Abia Yampidën shubu abentsëquën tabadquid mibitedi icnuc aidën natedi mitsana nec. ²²Aidën bacuëbo icquin mibitedishun con utsi ëbi caic. Adembidi Apodotsen mimbi adoaic. Adembidi Petedotsen mimbi con utsi caoaic. Nidaid abubëdta uashumbic aidënquiocquidtedimbo uabanquid yec aidtedishun icbo Nuquin Papa nec. Adecbidi aton bacuë mibitedi icnuc aidtedimbo mitsana nec. Esuquidistu uincuenacpadec uincuentequido mibitedi neoaindac. Nidaidën tabadec unëstequidbidi mibi nec. Nëid ushën mibi nidaidën tabadte ushë nec. Yuecash abuctsen mibi tabadendac. Abitedi Nuquin Icbon natedi nec. Aidën cuëmbanaido mibitedi icnuc aidtedi mitsanabidi nec. ²³Mibitedishun icbo Esuquidistu nec. Esuquidistun icbo, Edoen, aton Papa nec.

Esuquidistu chuishunquido

4 ¹Icbo Esuquidistu chuibenequid Pabado nec. Adquidbidi Pabado yacpadquidtedi nec, quequin mimbi tantiata. Ënden Abia Yampidën Nuquin Papan Esuquidistu chuibeneta, quenquiocpampidëmbi nëbi aid chuibeneta cac chuibanec nebi. Adembidi Pabado yacpadquidon chuibenec, quequin mibitedishun tantiata. ²Nuquin Papan, Esuquidistu chuibeneta, cacpadomboen niaquenquiocquin ëbipadquidon chuibenetiad. ³Nuquin Icbon, Ëbi chuibeneta, caid ëbi icnuc ïPabadon

bëdamboenda chuipec? quequin tantianuna, ïmimbi cactabi dacuëdpe? Padenquio. Adembidi, Nuquin Papan chiacpadomboen chiombi, quetiapimbo iquebi. ⁴Ambi chiacpaden niaquenquio iccombi, quetiapimbocnobi abitedi isquidquio abitedi tantiaquidquio Nuquin Icbo icquin ëbi chuibanec bëdamboec tabadsho isun aidën chiendac. Adembidi ëbi chuibanec icsamboec tabadsho isun chiendac. ⁵Icsamboen natsiash, quec tsadenda. Nuquin Icbo choashun icsambocquid cuidendac, quequin cainta. Aidëmbi choashun matses icsamboen ismec tabadaid abi ompoec tabadaidbëdta chuibanshun cuidendac. Adembidi, matsesën ëquëducshun tantiaid chuibanquin cuidendac. Adembidi, utsibo bëdamboec tabadaid chuibanquin chuioaindac, Bëdamboen mimbi naoc, quequin.

⁶Adembidi chuinu. Tantiata. Pabadopadquid Apodos nec, quequin ma mibitedishun tantianueshun chuibanombi. Aden tantiabanec, Pabadopadquid utsi nibëdec, quesa ma icpanuna. Adecbidi, Apodospadquid utsi nibëdec, quesa ma utsibotsen icpanuna. Nuquin Icbopadquid utsi nibëdec, quequin tantiec tabad. Adecbidi, Codinto yacnocquidopadquid utsi nibëdec, quenda. ⁷¿Mitsicquidën adquid mibi icmebampashba? ¿Abembida mibi adquid icpeba? Nuquin Icbon tantiamiac nabanash, ïatotsi quiah, ëmbi tantiapaden naombi, quepe mibi?

⁸Nuquin Papan chiaid dadpen tantiaquid nebi, quequin nua cubudquin peshun isuidacpadomboen ambi chiaid nëbi mibitedishun tantiauidpec. ¿Adpecta Nuquin Papan bëdambo icmiaido tabadpadic? Nuquin Papa yacno ënden puduedacbmboec yash chuiquid dapa nebi, quiacbmboec

mibitedi tabadpec mibi Esuquidistu chuibanquidtedi adec tabadtiapimbo icnubi. Mibitedibëd ëbi yacpadquido ëbi chedo ënden chuiquid dapa yacpadquido icmiondac, Cuishon, quetsiabi. ⁹Adecbidi, Bëdambo iquebi, quec mibi tabadnubi naden tantiec tsadebique. Tantia. Chuinu. Ëmbi chuibeneta caido unëseque. Is, Nuquin Papa quiacbimboecnuc ambi abi yacnoshon uaido mayan bëdabobëdtan matstedishun isbededac bimboecquid nebi, quequin ëmbibi tantiec tsadebi aden isbededec aido tabadenquiocnobi. ¹⁰Esuquidistu chuibenequidon chuibansho tantiauidash, Pabiate icsachitashien nec, quequin mamënshumbededashic Codinto yacnocquidon ambibi tantiaquin chuibansho tantiaquidquido nec, quepec Esus tantiesabo. Adecbidi, utsibo dacuëdampambo iquec, quiasch uëdëequin Esuquidistu chuibenequidon Nuquin Papan chiaid chuibanubi cuesambo yac bimboen mibitedishun chuibampec. Esuquidistu tantiesan yuedaido mibitedi icnubien utsin yuedtemaid Esuquidistu chuibenequido nec. ¹¹Esuquidistu chuibenequid yequi pistëc petsec abi bunec tsadebi. Adecbidi, acte acash bunec tsadquid nebi. Adecbidi dashcute icsactsëcquid dasiuidquid nebi. Adquiecbidi Esuquidistu chuibenequid utsibo iquec. Utsin mëyanded-mëyandedaid nebi. Quenenash iquenquio icquin capucuenequin Esuquidistu chuibenec nebi. ¹²Con pete bednuequin shubumpi nacnenquidquio iquec chonoadsho isquin utsibon mamënshunaid nebi. Aden mamënshunubi chonoadebi. Adecbidi Pabado icsambocquid nec, quequin chiaqui aido cuidenquiocquin bëdamboen ista, Papa, quequin aido chiemi. Utsin mëyanaqui dayacquio

yec cacuidanesa nebi. Adquidbidi Esuquidistu chuibenequid utsibo nec. ¹³Adembidi, utsin ëbi mua uaquin chiaqui cuidnanenquiocquin bëdamboen chiemi. Adembidi ëmbi Esuquidistu chuibeniaqui icsactsëcquid nec, quequin ambi secanu caidbimboecnuc ëbi ispec. ¹⁴Adecbidi, Bëdambo iquebi, quec mibitedi tabadnubi mëyamboc tsadebi. Adec ëbi tabadaid ëmbi chiac Codinto yacnocquido unësquio yampec, quenquiocquin ëbi tabadaid mibitedi tantiamenuen dada uaombi. Pabadon chiaid abimbo iqueque. Bëdamboec tabadnuna mibi camenuen dada uaombi, con bacuëbo. Mibi tantiac unësquio iquec. ¹⁵Mibi chuibanquid utsi dadpen nëbi icnubi Esuquidistu ëmbia chiac mibitedi aid tantiaquid icpondac. Mibi chuibanquid utsibo min papa ictiapimbo iquec. Esuquidistu tantiaquid ëbia yanshun Esuquidistu chuibanac mibitedi Esuquidistu tantiaquido yampondac. Ëmbi chuibanacpaden chiaid tantiaquido con bacuëbo ëmbi caidtedi nec. Adquid mibitedi icnuc papa nebique. ¹⁶Ëmbi nacpadomboen naic tabadta quequin mibitedi chiemi. ¹⁷Mibi ëmbi nacpadquiequec tabadte tantiamenuquin Timoteyo mibi yacno nidmembi. Aidi ëmbi chuibanac Esuquidistu tantiaquid icpondash. Adquid iccondacsho ëmbi con mado caid aidi nec. Aidi Esuquidistu tantiaquidquido icquin utsi-utsiec yacnoshon ëmbi chuibeniacpadomboen chuibanacquin Timoteyon mibi padpiden tantiamendac. Esuquidistu tantiaquid utsibo iccuededacnoshon chuibanacpadomboen ismequin chuibanquid aibidi nec. ¹⁸Mibi utsi-utsiec Pabado choainquio iquec quequin abimbo tantiac bimboen chuibanec. ¹⁹Aden adquidon chuinubi

Nuquin Papa bunuc badedquio mibi yacno nidebique. Ista. Mibi yacno puduedshun abi onquiaid tantianu quenquiocquin abi naic tabadaid isnuna caindambi. ²⁰Nuquin Papa tantiaquido ambibi tantiacpadec onquesa nec. Nuquin Papan Mayanën tantiamiacpadec onquequid Esuquidistu tantiaquido nec. Adquid Icbon tantiamiacpadomboen nabanec tabadquid nec. ²¹¿Mibi yacno puduedshun atotsimbi adquid napeque? Chui. ¿Cuesnu quiacbimboendambi adquid comapenen chushcaquin tantiemepe? ¿Adenquiocquindambi ëbëd icquid nec quequin chuibanquin adquid tantiemepe?

Esuquidistu tantiaquid ambi chudtemaid chudquid cacumeta caid

5 ¹Mibëd Esuquidistu tantiec iccuededquid abentsëc ambi chudtemaid chudquid iquec quequin chiec onquec. Aden naisa isadaidbo nec. Ademibidi naisa isadaidpemo nec. Aton papa icbon chido, anin dauid, bedshun chudesa aido nec. Mibëd icquid abentsëc adquid iquec quec. ²Adquid mibëdi icnuc, Bëdambo icmiaido nebi, quenquioctiadquidi mibitedi nec. Adquid icsaquid mibëd icsho isash unësquio icquimbi aidi cacumepatecnëdan. ³Mibëd ictiapimbo yequi mibëd yacbimboecquin dada uaquin icsaquid cacumetiadquidi mibi nenëdac quequin chuibanombi. ⁴Esuquidistu tantiaquid nuquitedi nec, quec mibitedi iccuededec Nuquin Icho Esuquidistun tantiamiacpadomboen Pabadon naden natsiash quequin ⁵icsaquid nidme ma Satanasën mëyanac icsa bunesa yanacsho Nuquin Icho Esuquidistu choashun ma abi yacno yuedpanuna.

⁶Esuquidistun ënden bëdambocquid icmiaidtedi nebi, quenda. Icsaquid

abentsëc mibëd tabadquin abi icsamboec tabadaid ismiac acte maisacbimboec mibitedi adquiobidi ictsiac. ⁷Ënden mibitedi Esuquidistu tantiesabo yec icsaquin ismec maisaccondacpadec maismane queshun icsaquid nidmeta. Ëbi cuidmenquiocnoec abided cuidadec Esuquidistu unëspanëdash, quiaish aid icsaisa yacpadquieç tabadta. ⁸Aden ambi naid tantiec icsaondacpadpenquio yec ma tabadpanuna. Aidquio tantiembi, quec abimbo tantiadonec ma tabadtenepanuna.

⁹Ambi chudtemaid chudquidbëd iccuededenda, quequin ënden dada uaondambi. ¹⁰Esuquidistu tantiesabëd iccuededenda, quenquiocquin Esuquidistu tantiaquid adquid icsho isash iccuededenda, quequin dada uaondambi caimbi. Ambi chudtemaid chudquid Esuquidistu tantiesa dadpen iquec. Adecbidi, utsin na bunquin mua uain bedquid dadpen iquec. Adecbidi, matsesën Nuquin Papan uaidbimboecnuc nacnenaid tantiaquid Esuquidistu tantiesa dadpen iquec. ¿Adquido ismane quiaish mitsimbo mibi tabadpe? Nuquin Papa yacno adquid nibëdec. Nuquin Papa yacno nidash icsaquid isenquio yec mibi tabadendac. ¹¹Esuquidistu tantiaquid nebi, quequid icsadenesho isash adquidbëd iccuededenda caimbi. Esuquidistu tantiaquid nebi, queshun ambi chudtemaid chudquin ënesabëd iccuededenda. Adecbidi, muaquin bedbanquidbëd iccuededenda. Adecbidi, Esuquidistu tantiaquid nebi, queshun matsesën Nuquin Papan uaidbimboecnuc nacnenaid tantiaquin ënesabëd iccuededenda. Adecbidi, Esuquidistu tantiaquid nebi, queshun ambi tantiacpadpenquiocquidën chuisho mamënshumënquin ënesabëd

iccuededenda. Adecbidi, Esuquidistu tantiaquid nebi, qeshun cuesanquin ampequin ënesabëd iccuededenda. Adecbidi, Esuquidistu tantiaquid nebi, quiaish ëmbi chuibocpadquid icsaquidbëd iccuededenda. Adembidi aidobëdtan penda.

¹²¿Esuquidistu tantiesa abi icsaid chuiquin cacumeta, quequindambi chuipe? Padenquo. Esuquidistu tantiaquid mibëd icquid icsadenequin ënenquiocsho isun Nuquin Papan chiaid comapenen tantiaquin mibi icsaid ënta, quequin chui. ¹³Nuquin Papambien Esuquidistu tantiesa icsaid chuiquin cuidendac. Mimbi Esuquidistu tantiaquid icsadenequid cacumeta.

Ëbi chushcananaid tantiashun mimbi tantiacpaden chui caid

6 ¹Esuquidistu tantiaquid daëd nëishash chushcananec, queoaic. Adquid chuinu. Tanta. Nëishash chushcananash Esuquidistu tantiesa yacno nidshun, Ëbi chushquiaid chuisho tantiashun ¿midapaden mimbi chieque? Ëbi chui, quequin mimbi chuipec. ¿Atotsi quiaish Esuquidistu tantiaquid yacno nidtiadquidi Esuquidistu tantiesa yacno nidshun mimbi adquid chui, cape? ²Yuecshun, ¿Midapaden mimbi Esuquidistu tantiesan naid chieque? Tantanu. Chui, abi tantiaquido Nuquin Papan caquien ¿nuqui chiacpaden aido Nuquin Papan cuidendac, quequin tantienquioda mimbi icpe? Yuecshun tantiesan naid chiemi, qeshun ¿Atotsieshun Esuquidistu tantiaquidbëd chushcananash tantiesa yacno nidshun mimbi chuibampe? ³Yuecshun, ¿Ëmbi uaido mayanën naid midapaden mimbi chieque? Tantanu. Chui, Nuquin Papan caquien ¿nuqui chiacpaden aido cuidendac, quequin tantienquioda mimbi icpe? ⁴Adquidon naid ëmbi

chiacpadomboen Nuquin Papan cuidendac, quequin tantiaquin ¿atotsieshun Esuquidistu tantiaquid daëd nëishash chushcananasho tantiashun, Esuquidistu tantiesa yacno nidshun, Ëbi chushquiaid chiacsho mimbi tantiacpaden ëbi chui, mimbi cape? ⁵¿Esuquidistu tantiaquid utsibo nibëdpecta ictic? ¿Esuquidistu tantiaquidën icsamboen chuinushe qeshunda Esuquidistu tantiesa yacno nidshun, Ëbi chushquiaid chiacsho mimbi tantiacpaden chui, mimbi cape? ¿Bëdamboec tabadaid Esuquidistu tantiaquid utsibon comapenen tantienquioctsiash, quequinda mimbi tantiae? ⁶Mibipadquid Esuquidistu tantiaquid utsibo yacno nidenquo yec mibipadquidpenquo Esuquidistu tantiesa yacno nidshun utsibëd chushcananaid mimbi chieque. Adenda.

⁷Ëbi chushcananaid ëbi daëdshun chiacsho tantiashun mimbi tantiacpaden chui. Tantanu, quequid mibëd icnuc Nuquin Papan bëdamboquid icmiabicquid mibitedi nec. Esuquidistu tantiaquid utsin mibi icsamboen nasho isash ¿atotsi quiaish nëishash chushcanampe? Adembidi, Esuquidistu tantiaquid utsin muaquin mitsana bedacsho isash ¿atotsi quiaish nëishash chushcanampe? ⁸Cuidnante bunec mibi adpec. Naden natiad. Ëbëd chushcananquid Esuquidistu tantiaquid nec, quec abi cuidte bunenquo yec abi yacno nidshun abi icsaboed tantiamequin Nuquin Papan chiaid chuiban.

⁹¿Icsadenequin ënesa Nuquin Papa yacno puduedesa nec, quequin tantienquioda mimbi icpe? Esuquidistu tantiesabo tabadacpadquiec tabadec icsate bunquid yec Esus tantiaquid nebi quec mibibi mua uadenda. Ambi chudtemaid chudquin ënesa Nuquin

Papa yacno yuedtemaid nendac.
 Adembidi, Nuquin Papan
 uaidbimboecnuc nacnenaid tantiaquin
 ënesa abi yacno yuedtemaido nendac.
 Adembidi, ambi inacmaid chudquido
 abi yacno yuedtemaido nendac.
 Adembidi, aton bënëpen chudmequin
 ënesa, adecbidi dada daëd
 chichudnanquin ënesa, adecbidi chido
 daëd dachudnanquin ënesa Nuquin
 Papa yacno yuedtemaido nendac.
¹⁰Adembidi, ampequin ënesa Nuquin
 Papa yacno yuedtemaid nendac.
 Adembidi, muaquin utsin na bedquin
 ënesa, adembidi, ambi
 tantiacpadpenquiocquidën chuisho
 mamëshunquin ënesa, adembidi,
 cuesunianquin ampequin ënesa.
 Adquido Nuquin Papan ambi abucshun
 nacnenaidën tabadtemaido nendac.
¹¹Ënden mibi adquo iccondaidi nëbi
 utsi-utsiec padenquo icsho isash
 Nuquin Papa mibi cuidenquo yec mibi
 icsaid bëpiscudac. Adembidi, Nuquin
 Papan mibitedi bëdambo
 icmebanuequin abipadquid aton Mayan
 mibitedi meniac. Aidi meneshun
 Esuquidistu icsapenquiocquid isacpaden
 Nuquin Papan mibitedi isoaic.

**Ëmbi chudtemaid chudmane qeshun
 adquid isuidteneta quiaid**

¹²Ëmbi natemaid naden nata caid
 nibëdec qeshun naic bëdambocquid
 ictiapimbo iquebi, quiaish padenquo yec
 tsadebi. Aden nabanquin ëntiapimbo
 icmane quiaish padenquo iquec tsadebi.
¹³Matsesën chebudaïd pucu yacno
 budash dada bëdambo icmianquid nec.
 Yuecash matsesën dada chodquetequid
 nendac. Padnuen, ëbi tabadte ma
 icpanueshun Nuquin Papan matses
 uapampic. Abi tantiaquid abi tabadte
 iquec. Adecbidi adquidbëd Nuquin Papa
 iquec. Ad icnuc mimbi chudtemaid

chudquid icta, quenquo Nuquin Papa
 icpampic. Ambi chudtemaid chudquid
 Nuquin Papa tabadte ictiapimbo iquec.
 Aden naquid chian anëdënquequid
 nësecatequid nendac. ¹⁴Nadatiambocquin
 Esuquidistu Nuquin Icbo Nuquin Papan
 uincuemepanëdash. Aidëmbi nuquitsen
 abi tantiaquid icsho uincuemendac.
¹⁵¿Abi tantiaquid icquin, Esuquidistubëd
 daëdash tabadquid nebi, quequin
 tantienquioda mimbi icpe? Ai, aïdbëdi
 daëdtequid nuqui nec. ¿Adquidbëd
 daëdashabi icsaquidbëd daëdoape?
 Padenquo iquebi. ¹⁶¿Dadpen
 chudmequid chudash
 daëdacbimboecquid nec, quequin
 mibitedishun tantienquioda icpe? Aid
 daëdi dada abentsëc yacbimboecquid nec,
 quequin Nuquin Papan dada uamiampid
 nec. ¹⁷Nuquin Icbobëd daëdaïdien Icbon
 tantiacpadquiec tabadquid nec.

¹⁸Ëmbi inacmaid chudmane qeshun
 chido utsi isuidteneta. Padenquo yec
 icsaquidbëd daëdquid mibi iquendac.
 Ambi chudtemaid chudquid aton namibëd
 ëquëducüesh daëdaïd nec. Nami
 umanucüesh icsaid namibëd daëdtiapimbo
 iquec. ¹⁹Nuquin Papan Mayan tabadtequid
 Esuquidistu tantiaquido nec. ¿Nuquin
 Papan ëbëd tabadmiaïd abipadquid nec,
 quequin tantienquioda mibitedishun icpe?
 Èbibi nuquin icbo nec, quetiapiimbo matses
 iquec. Adecbidi, Con icbo nibëdec. Ëmbi
 tantiacpaden naimbi, quetiapiimbo mibi
 iquec. ²⁰Nuquin Icbo cuesten dectanac
 matses icsaquid icsho cuidnushe quiaish
 abided cuidadec unësqid Nuquin Papan
 icmiac abi tantiaquid yec aïdën na
 mibitedi nec. Adoaidi ambi chiapaden
 ismec bëdamboec tabadteneta.

Dada chidobëdi daëdaïd

7 ¹Nëbi mimbi dada uaboed isombi.
 Aid isun ëmbi tantiacpaden
 chiembique. Tantiata. Chido inquid

dadatedida ictiad quequin mimbi tantiapec. Padnuen, Chido bedenquio iquembi, qesho chido inta cainda caimbi mibi. ²Esuquidistu tantiesa yec ambi chudtemaid chudquid Codinto yacno tabadquid utsibo dadpen iquec. Aidpadquid icmane quiash chido abentsēc inquit dada ictiad. Adecbidi dada abentsēcshun inaid chido ictiad. ³Con chido ěmbi inaid nec, quequin aiduidi chudquid icta. Adecbidi con bĕnĕ ěbi inquit nec, quequin aiduidi chudmequid chido nec. ⁴Chidon dada daĕdash aton bĕnĕn dadabidi nec. Adecbidi dadan dada chidon dadabidi nec. ⁵Aid daĕdi daĕdabi yacbimboec, Padi, quenda. Adboedi, Nuquin Papa chuinec nĕidtedi ushquin padenquio nuqui iquec, qeshun ĕnta. Aidtedec ushquin padenquiocshon, Ĕmbi yuen ĕntiapimbocsho isun Satanasĕn icsamenushe qeshun padpiden nata. ⁶Ĕnta quenquio iquebi. Nĕidtedi ushquin padenquio iquembi quiash mibi daĕdi aidtedecuidi ushec ĕnĕĕta caimbi. ⁷Padnuen, chido inesa ěbi yacpadec dadatedi icpashun. Dada utsi-utsiec Nuquin Papan icmiacpaden chido inquit icnubi utsi-utsiec chido inesa iquec.

⁸Chido inesa ěbi tabadacpadec dada utsitedi tabadec bĕdambo ictsias. Adecbidi dadan inaidpen bĕdambo ictsias chido. Dada bĕnua adecbidi bĕdambo ictsias. ⁹Adquid icquin isuidtiapimbo yec comapenec chudte bunquin chido inta. Adecbidi chido bĕnua dada isuidtiapimbo iquec dadan inaid icta.

¹⁰Daĕdash niamĕnenda. Ĕmbibi chienquiocquin Nuquin Icbon aden chuinĕdacpadembi chiembique. Tania.

¹¹Min bĕnĕ nianash utsin inaid iquenda. Dadan inaid icnu quec mimbi niamboedĕn inaid icoata. Ademibidi

chido inquit min chido bunenquiocquin abi icsaid dada uashun ismequin nidmenda.

¹²Nĕbi Nuquin Icbon naden chuiban cainquiocnobi ĕmbia Esuquidistu tantiaquid icquin Esuquidistu tantiaquid utsibo ĕmbi chuibocpadembi mibitedi chuioaimbique. Tania. Dada aton chidobĕdi Esuquidistu tantiesa icboedi aton bĕnĕ Esuquidistu tantiaquid yanuc aton chido padenquio yec, Con bĕnĕ nianu, quenquio ictsias. Adquid icsho isash. Con chido icsambocquid nec, quenquio yec abĕdi tabadquid bĕnĕ.

¹³Adecbidi chido utsi aton bĕnĕbĕd Esuquidistu tantiesa icboedi aton chido Esuquidistu tantiaquid yantsias. Aden Esuquidistu tantias, Con bĕnĕ icsambocquid nec, quenquio yec bĕnĕ nianec nidesa chido. ¹⁴Esuquidistu tantiabi yec daĕdacpadec aton chido Esuquidistu tantiaquid yanash aidbĕd abentsēc yacbimboec tabadec bĕnĕ. Adec bĕdamboec tabadsho isun Nuquin Papan chido bĕdamboen tabadmequin bĕnĕtsen bĕdambo icmebampec. Chido Esuquidistu tantiaquid icquin aton bĕnĕ padenquiocnobi aton bacuĕbo tantiec, Icsambocquidĕn bacuĕbo nec, utsibo quenushe quiash bĕnĕbĕd abentsēc yacbimboec tabadquid chido. Adecbidi dada Esuquidistu tantiaquid icquin aton chido padenquiocnobi adomboembidi aton bacuĕbo tantiec aton chido Esuquidistu tantiesabĕd tabadquid dada. Adec abentsēc yacbimboec tabadsho isun, Bĕdamboquidĕn bacuĕbo nec, quequin utsibon ispec.

¹⁵Utsimbic ambi bedboedĕn aton chidon Esuquidistu tantias. Adoquien, Mibĕd tabadte bunebique. Ĕbi nidmenda, quetsias chido bĕnĕ caic. Adoqui, Nidec nid, cac cacuidenquio yec nidquid chido. Chido utsibic aton bĕnĕ

Esuquidistu tantiaquid yansho isash,
Mibi nianu, quetsiash. Adoaquien, Mibi
unësquio iquec, quetsiash bënë.

¹⁶Adnubien dadan nidta caid aton chido
Esuquidistu tantiaquid yec
bëdambocquid icscho isash Esuquidistu
tantiaquidtsen yantsiash bënë. ¿Adquid
yantsiash, quequin tantienquioda mimbi
icepe? Adecbidi, chidon nianu caid aton
bënë bëdambocquid icscho isash
Esuquidistu tantiaquid chidotsen
yantsiash. Adecbidi ¿Adquidtsen
yantsiash, quequin tantienquioda mimbi
icepe?

¹⁷Mibi Esuquidistu tantiaquid yanash
Nuquin Papan tantiacpadec tabadnu
quiash adequi tabadta. Adomboembidi
Esuquidistu tantiec iccuededquid utsibo
chui banombi. ¹⁸Esuquidistu tantiesa
shui dëbid dëteshunaid yec Esuquidistu
tantiaquid yanash ëbi shui dëbid
dëteshunacmaïdbimboecnuc nacnemen
quenquo yec tabadta. Adecbidi,
Esuquidistu tantiesa shui dëbid
dëteshunacmaïd yec Esuquidistu
tantiaquid yanash shui dëbid dëtemenu
quenda. ¹⁹Shui dëbid dëteshunaidta nec,
quenquo yec Nuquin Papa tsadec.
Adecbidi, Shui dëbid dëteshunacmaïdta
nec, quenquo yec Nuquin Papa tsadec.
Adquid nec quenquo yec, Ëmbi
chiacpadomboen nadenequidta nec,
quec Nuquin Papa tantiec tsadec.
^{20,21}Adec Nuquin Papa tantiec tsadnuc
yua Esuquidistu tantiaquid yanash
yuapen icnu quenquo yec tabad.
Adecbidi, utsin yuapenquo yec utsin
yua icnu quenquo yec tabadoa. ²²Yua
Esuquidistu tantiesa icboedi Esuquidistu
tantiaquid yansho isun, Yua nec,
cainquo icquin Nuquin Icbon
cuënendac. Adembidi, utsin yuapenquo
Esuquidistu tantiesa icboedi Esuquidistu
tantiaquid yanash Nuquin Icbon
namiaidquo nendac. ²³Matses icsaquid

icscho cuidnushe quiash abided cuidadec
unësquid Esuquidistu Nuquin Papan
icmiac aid tantiaquid iquec, Con icbo
nec, quiash utsin yuaid iquenda.

²⁴Adembidi chuinu. Tantiata. Nuquin
Papan mibi cuënuc matses yec
Esuquidistu tantiaquid yanash, Ëbëd
tabadquid con Icbon nec, quec matses
yec bëdamboec tabadta.

²⁵Chido inesabëdta dadan inacmaïd
chuita quequin mimbi dada uaid isun
aidotsen chiembi. Aido tantiaquin
naden chuita Nuquin Icbon cainquo
yaqui Nuquin Icbon ëbi chui beneta caid
icquin naden mibitedi chiembique.
Tantia. ²⁶Natiatequid icnuc Esuquidistu
tantiaquid chido inesa yec adequi tabad.
Adecbidi, dadan inacmaïd yec adequi
tabadta chido. ²⁷Chido inquit yec chido
inesa icnu quenda. Adecbidi, chido
inesa yec chido inu quenda. ²⁸Chido
inesa icboedi chido inquit yanash
Nuquin Papan chiaïd niaquesa nec.
Adecbidi, dadan inacmaïd icboedi
dadannaid yanash Nuquin Papan
chiaïd niaquesa chido nec. Natiaic
cametequid icnuc, ¿Mitsipadentsimbi
con chidobëdta con bacuëbo bëdambo
icmepeba? quec chido inquit tabadec.
Chido inesain aden tantienquo yec
tabadec. Natiaic cametequid choec quec
chido inesa yec adequi tabad. Adecbidi,
dadannaid yec adequi tabadta,
quequin mibi chiembi ma
nati amianquiec quenquo yec ma mibi
tabadnueshun.

²⁹Ëmbi chuiboed mibi bëdamboen
tanti amembique. Tantia. Nidaidën yuec
tabadnu, queti apimbo nuqui iquec.
Nuquin Papa chieshënte ushë chonoc
abi tantiaquid dadpen mëyansho isash
Esuquidistu chote anoentsëqui yaneque.
Abi yacno utsibo puduedti apimbo
icnushe qeshun min chido icnubi
Nuquin Papa bunacpadomboen nabanec

tabadta. ³⁰Adecbidi, unësquio yec shubiquimbi Nuquin Papa bunacpadomboen nabanec tabadta. Adecbidi, bédambo yequi Nuquin Papa bunacpadomboen nabanec tabadta. Adecbidi, mitsana icnubi aid tantienquio yec Nuquin Papa bunacpadomboen nabanec tabadta. ³¹Yuecshun ëmbi nidaidënshun bedaid Nuquin Papan ëmendac, quequin tantiaquin ambi chiacpadomboen nabanec tabadta.

³²Natiequid nibëdpashun, queshumbic natiamiantequid iquendac, quequin tantiembi. Aden tantiaquin chido inesa icta caombi. Chido inesa Esuquidistu tantiaquid icquin Nuquin Papan tantiacpadenuidi nanu queshun aden nabanec tabadpec. ³³Chido inquidien, Nuquin Papan tantiacpadenuidi nanu quiash, ðmitsipadentsimbi con chidobëdta con bacuëbo bédambo iquebi camepeba? quec tabadec. ³⁴Adquid Nuquin Papan tantiacpadenuidi nanu quetiapimbo iquec. Dadan inacmaidien Esuquidistu tantiaquid Nuquin Papan tantiacpadenuidi nanu quec adequi tabadpec. Dadan inaidien, Naden nashunacsho con bënën bédamboen istsiashi, quec tabadec. ³⁵Aden mibi chuibanquimbi chido inesa chido bednu quesho, Chën, caisa nebi. Nuquin Papan chiapadomboen nabamboedëmbi utsi uain tantianushe queshun ëmbi tantiaid chuibanec nebi. Nuquin Papan tantiacpadomboen bédamboen tabadmenuequin aden tantiaquin chuibanec nebi.

³⁶Adembidi, Min champi bednu queboed chudte bunec mëmuntiapimbo icsho isun, Inec cho, cata. Min champi imec icsatiapimbo mibi iquec. Adecbidi, dadan inacmaid macho budsho isash, Bacuë tishtiapimbo yantsiash, quiash,

Con champi inec cho, quiash icsatiapimbo adquid icoaic. ³⁷Adecbidi, min champi inu queboedi, Bedenquio iquembi, quesho tantiasun menenda. Aden bedmenquio yec mibi bédambo icpec. ³⁸Con champi bedec cho, queshun bedmiash, Bédambo iquebi, quenubi, Con champi dadan inacmaid iquec quec bédamboshë utsi icpec.

³⁹Dadan inaid icquin min bënë nianenda. Min bënë unësan utsin inaid icnu quiash adta. Esuquidistu tantiesan inaid iquenda. ⁴⁰Bënu utsin inacmaid icnu quiash bédamboshë iquec aid. Ëmbi tantiacpaden ëmbi chuiboed Nuquin Papan Mayanën tantiamiacpaden chiaid nec.

Nuquin Papan uaidbimboecnuc nacnenaid tantiaquin pambid dasanaid

8 ¹Nëbi Nuquin Papan uaidbimboecnuc nacnenaid tantiaquin pambid dasanaid chuinun naden chiembique. Tantiata. ðMatsesën nacnenaidta nuqui tantiaid ictic? Padenquio. Aden tantiaquin ëmbi tantiacpadpenquio icquid utsibo nec quequin mamënshumpec. Aden tantiaquin mamënshunquin utsi tantienquio iquec. Utsien, Naden nabanquindambi utsibo bédamboen tabadmepeba, quequin tantiaquidquio nec. ²Ëmbibi tantiembi quequid tantiabnabictsëcquid nec. ³Nuquin Papa tantiaquidien Nuquin Papan tantiaidquio nendac.

⁴Aden chuishun ðNuquin Papan uaidbimboecnuc matsesën nacnenaid tantiaquin pambid dasanaidtambi pepe? quequin mimbi chuiquin dada uaboed isun chuinu. Tantiata. Nuquin Papan uaidbimboecnuc matsesën nacnenaid nanac uec. Aden nanac uequid Nuquin Papa ictiapimbo iquec. Nuquin Papapadquid utsi nibëdquie. ⁵Nidaidën

samèdquid papa cain utsin cuènaid dadpen iquec. Adembidi abuc samèdquid Papa cain utsin cuènaid dadpen iquec. ⁶Papa cain nuquin cuènaidien Abia Yampidquio nec. Adquid utsi Nuquin Papa cainquio nuqui iquec. Aidi abitedimbo uabampampidquio nec. Aidquio tantiec nuqui tabadec. Adembidi Nuquin Icho cain cuènaidquio Esuquidistu nec. Aidèmbi aton Papabèdta abitedimbo uabampampid nec. Aidi cuesten dectanac abided cuidadac nuqui cuidtiadquid icnubi Nuquin Papan cuèmbanaido yec ambi tantiaido nuqui nec.

⁷Adembidi aid abentsèqui nuqui tantiaidquio icnubi Nuquin Papan uaidbimboecnuc matsesèn nacnenaid utsibon tantiaid iquec. Aden nacnenaid tantiaquin pambid dasanaid aidon pepec. Aden peboedèmbi Esuquidistu tantiaquid yanshun nacnenaid tantiaquin pambid dasanaid èmbi pesho isun, Icsaosh, Nuquin Papan canushe, queshun adquid petiapimbo yanebi. ⁸Nuqui piaid Nuquin Papa tantiamianesa nec. Ad icnuc Nuquin Papan uaidbimboecnuc matsesèn nacnenaid tantiaquin pambid dasanaid penquiocsho isash, Aid bèdambocquid nec, quenquio Nuquin Papa iquec. Adecbidi, nacnenaid tantiaquidèn dasanaid pesho isash, Aid bèdambocquid nec, quenquio icoaic Nuquin Papa.

⁹Padnuen Nuquin Papan uaidbimboecnuc matsesèn nacnenaid tantiaquin pambid dasanaid èmbi bedshun pesho isash, Esuquidistu comapenen tantiaquidèn tantiaid nacnenaid nec, Esuquidistu tantiabenabictsècquid quenushe queshun padenquio iquembi. ¹⁰Aid pesho isash, Nacnenaid papa cain

cuènaid nepec, queshun, Aid tantiaquin èmbitsen pambid dasanaid penu, quetsiash Esuquidistu tantiabenabictsècquid. ¹¹Padnuen èmbi piaid Nuquin Papa tantiamianesa nec quequin mimbi tantiec. Aden tantiaquin nacnenaid tantiaquin pambid dasanaid mimbi pec. Aden tantiaquin mimbi penubi Esuquidistu tantiabenabictsècquidèn Nuquin Papa tantiamiantequid nacnenaid tantiaquin pambid dasanaid nec, quequin pec. Esuquidistu comapenen tantiaquid mibi icquimbi nacnenaid tantiaquidèn dasanaid èbi icsainquio ictequid nec quequin pequin Esuquidistu tantiabenabictsècquido mimbi icsameyoc. Mimbi icsamiaido tantiec Esuquidistu unèsanèdash. ¹²Ad icnuc Esuquidistu tantiabenabictsècquid mimbi icsamequin Nuquin Icbon chiacpadomboen niacquid mibi neyoc. ¹³Padnuen Esuquidistu tantiaquid utsibon icsamboen tantiaquin penushe queshun padpiden penquio iquembi ma icsainquio icpanu queshun.

Esuquidistu tantiaquidon natequid

9 ¹Esuquidistu chuibeneta cacmaid Pabado nec quequidotsen chuinu. Tantia. ¿Matsesèn nata caidtabi nedi? Padenquio. Esuquidistun èbi chuibeneta caid nebi. ¿Adquidida nepeba quecta mibi icpe? ¿Nuquin Icbon chiacpadomboen èmbi chuibanac mibitedi abi tantiaquido yanenquioda ictionda? ²Ai, èmbi Esuquidistu chuibanac Esuquidistu tantiaquid mibitedi yanondac. Utsi-utsiec yacnocquid èmbi chuibanacmaid icnubi, Èmbi chuibanaido mibitedi nec, quequin tantiembi. Èmbi chuibanac Esuquidistu tantiaquid mibitedi yanshun, Esuquidistun èbi chuibeneta caidquio nebi, quequin Pabado chaid

abimbo iquec, quequin bēdamboen tantiaquidquio mibi nepec tantesa uainquiocquin.

³Aden ěmbi Esuquidistu chuibanac abi tantiaquid mibitedi icquimbi utsin-utsinquien ěbi icsamboen chiec. Naden ěbi chieque. Tantia. Pabadon Bednabebēdtan chuibansho pemenuioctiad, quequin chiec. Aden chiec onquequid ěmbibi tantiaquin naden aido chiembique. Tantia.

⁴¿Esuquidistu chuibanec bundoenquiodabi icpe? ⁵Adembidi, Esuquidistu chuibanec utsibo aton chido Esuquidistu tantiaquid buanec capucuenesho isash, Bēdambo iquec, mibi quec. Adembidi utsibon aton chido buanubi Petedon aton chido buansho isash bēdambo iquec quiashic Esuquidistu chuibanec ěbēd capuquimbi Bednaben aton chido buansho isash, Icsambo iquec, quec mibi. ¿Esuquidistu chuibanec ěbēd capuequi aton chido buante bunenquioda Bednabe icpadic? ⁶Adembidi, ¿Mibi pemembique. Penuequin nabanenda, capenda Esuquidistu chuibenequid utsibo mimbi ique? Bednabebēdta ěbi chiec, ¿Penun daēdshun shubumpi nacnentiad, quepecta mibi ique?

⁷Ad yenquio utsibo iqueque. Tantia. Chuinu. ¿Sondado icquinda aton na buanshun pepec? Padenquio. Abi nashunquidombien pemeshun acmec. ¿Icbo abi nashunquid aton tiedēn caniquid pemesada nepadic? Padenquio. Pemeshumbien acmepaid. ¿Baca shuma chinshun icbon aquenquioda icpadic? Acquimbien icbon icquid. ⁸¿Aden chuiquin ěmbibi tantiaidtambi chuipo? Padenquio. Nuquin Papan Moises dada uamiampid ěmbi chiaid nec. ⁹Nad iqueque. Tantia. Chuinu: “Min tiedēn caniquid ěshē chicnueshun min baca tsuc-tsucmequin dēpuquenda ma penu,”

quequin Nuquin Papan chiaidquio nec. ¿Bacanuidi ma penu quequin Nuquin Papan chiaidta nepadic? Padenquio.

¹⁰Matsesbēdtambi ma penu quequin Nuquin Papan chiaidquio nec. Adembidi ambi piaid tantiaquin nabanquido icbo nec. Penuequin tiedēn caniquid icbon taneshcaic. Adembidi, penuequin ěshēacsho bedquid icbo nec.

¹¹Adembidi, ¿Nuquin Papan chiaid mibi paquiacquid yec pete bec cho quenquiotiadquidtabi nedí? ¹²Mibi chuibanquid utsibo menebanquimbi ěbia mibi chuiquidquio icsho menetiadquidi menianenquio mibi icpoc. Aden ěbi menenquio yaqui ěmbi chiaid tantienquio icnushe quiash, Bec cho, quetiapimbo iquebi mibi caic. Aden chuibanec bundoqueic capucuenec nebi. ¹³Nuquin Papa tabadte shubu uashunaid yacnoshon nashunquidēn ashunquio peshun aquec. Adembidi ashunquio nashunquid utsibon matsesēn Nuquin Papa menenun bēaid tauishun pambid tēshē bedshun peshun aquec. ¿Aden peshun acpec, quequin tantienquioda mimbi icpe? ¹⁴Adomboembidi Esuquidistu chuibansho abi tantiaquidon yuedec, quequin Nuquin Papan chiaid nec.

¹⁵Ěbi yuedtiadquidi nec, quequin tantiequi ¿adabi pemenun yuedpec? quesa nebi. Adembidi, Ěmbi dada uaid buamiacsho isun ěbi yuedtsiash, quequin dada uainquio iccombí. Bunquieic unēsbudec mibi caic, Bec cho, quenquio iquendabi. ¹⁶Ěbibi Esuquidistu chuibenenu quenquioccobí. Ambí ěbi chuibeneta cac Esuquidistu chuibenec nebi. Abi chiesa yanash unēsquio ictsiabi. ¹⁷Ěmbibi, Esuquidistu chuibenu, quiash, Bec cho, quetsiandabi. Esuquidistun ěbi chuibeneta caid yec ambi namiaidquio nebi. ¹⁸Esuquidistu chuidenesho isash,

zatotsi Pabadon bedpash, quepecta mibi ique? Naden Esuquidistu chuibenec nebique. Tantia. Bec cho, quenquiocquin Esuquidistu chuibenec nebi. Aden Esus chuibanac abi tantiaquid yansho isash bēdambo iquebi.

¹⁹Bec cho, quesa yec utsin yuacmaid nebi. Adquid yequi utsibo chuinuec nidane shubu utsin puduedcuenequin aidon namiaidbimboecquin aibēd tabadquin chuibanec nebi. Adec tabadquin ěmbi chiac ma aidotsen Esuquidistu tantiaquido yampanuna. ²⁰Adecbidi, isadaidbo Esuquidistu chuibanuec aidobēd tabadquin mimbi natemaid ěmbi natemaidpenquo nec, quenquiocquin ambi natemaid nainquo iquembi. Adquiec tabadquin ěmbi chuibanac ma isadaidbotsen Esuquidistu tantiaquido yampanuna. ²¹Adecbidi, isadaidpembo chuibanuec aido tabadacpadece abēdi tabadquin Esuquidistu chiacpadece niaquenquo yec tabadec nebi. Ěmbi adoac isadaidpembotsen ma Esuquidistu tantiaquido yampanuna. ²²Adecbidi, Esuquidistu tantiabenabictsēcquido chuibanuec ěmbi tantiabenabi iccondacpaden bēyuc tauain chiaidquo tantiamenuen chuibanec nebi. Ěmbi adoac ma aidotsen Esuquidistu tantiabenquidquo yampanuna. Adequi tabadquin Esuquidistu chuibanec nebi. Ěmbi adoac utsibo ma Esuquidistu tantiaquidquo yampanuna. ²³Adec tabadequi ma ěmbi Esuquidistu chuibeniac Esuquidistu tantiaquido yanash Nuquin Papa yacno nuquitedi tabadendac.

²⁴Titinquecuededquido icnuc bēyuc abia titinquec choquid iquendac. Adquid icsho isun, Mibi badedquo titinquic, quequin titinqueta quequidēn titinquec abia choquid

menendac. Adembidi, Nuquin Papan menete bēda iquec. Aid bednu, queshun Icbon chiacpadomboen nabanta, caimbi mibi. ²⁵Badedquo titinquenuequid bedte bunaid chodquetequid icnuc, Aid bednu, queshun abi bēdiactsēc titincamete pete icsa actequid icsabēdta isuidec titinquenuequid iquec. Nuquien chodquetemaid bednuequin icsaid isuidec. ²⁶Utsien, Bednu, quenquo yec titinquiec. Adembidi, Bednu, quenquo yec utsibēd mēdanten senanu quequin nibēdacnoshombi mēdanten seded-sededec. Aden tantiaquin naisa nebi. ²⁷Utsibon ma tantianu queshun Esuquidistu chuibenianash unēsacsho Nuquin Papan menete bēda bedtiapimbo icmane quianash icsaid mēmunc tsadebi.

Isadaidbon chieshampicpadece tabadenda quiaid

10 ^{1,2}Abi yacno abi tantiesha chosho puduedmenquo icchitoshe quianash Nuquin Papan chiaid chieshēnenquo yec bēdamboec tabad, quequin tantiamenuen, Nadec nuquin tsusedpabo tabadpampic, quequin chiembique. Tantiata. Equipito yacnoshon ambi mēnchicaidobēd Moises puduanec Nuquin Papan bēyucamiai abu ushu tēdion nidanequin tsusedpabon Acte Piu potepampic. ³Adec nidaniash yuecash aidtedi comapenec bundoacsho Nuquin Papan nadatiambocquin abucshun nebudaid tsusedpatedishun pebededpampic. ⁴Adembidi acte bundoacsho isun cuēnote cuesquin acte chomiaid acash, Ěbi bēdambo icmequin Nuquin Papan ambi yuecshun chometequid Quidistubēdta nadatiambocquin naid nec, quequin tsusedpabon utsin-utsinquien tantiabempampic. ⁵Aden tantiabenubien abēd icquid utsibon padenquo icpampic. Aden tantiesha Nuquin Papan nidaid Canan

caid menenu caid yacno niduidequi
unësbudnepampic adquittedi.

⁶Tsusedpabo chieshampicpadquid
icnushe queshun Nuquin Papan aido
chuiquin dada uamepampic. ⁷Ad icnuc
tsusedpabon Nuquin Papan
uaidbimboecnuc nacenashun papa cain
tantiampicpaden tantienda. Naden Nuquin
Papan aido chuiampic. Bacabimboecnuc
ambibi nacenaid tantiaquin peshun acash
baidacuedepampicpaden tantiaquin
nainda. ⁸Adembidi, tsusedpa utsibon ambi
chudtemaid chudampicpaden chudenda.
Aden nasho abi ushëmbi tsusedpabo
dadpen 23,000ted Nuquin Papan
cuesunemepampic. ⁹Adecbidi, ¿Ambi
chiaid niacshodabi Nuquin Papan
cuidpeba? quiampicpadec adenda. Aden
tantiaquido nisin pebededac
unësbudnepampic. ¹⁰Adecbidi, Equipito
yacnoshon mënichicaido abi mënichicquid
chieshec nadpampic. Equipito yacno iquec
bëdambo iccondaiddi nëmbo choash bunec
capuebi. Anobidi tabadec nidebi,
queded-quededsho ambi abi yacnoshon
uaid mayan bëdabo Nuquin Papan
budmiaiddën aittedi cuesunepampic.

¹¹Abi tsibanquido tantiamenuequin
tsusedpabo tabadnëdaidd icsa Nuquin
Papan chuiquin dada uamepampid ëmbi
chuiboed nec. ¹²Tsusedpabo Nuquin Papa
chieshënec icsapampicpadec icsamane
quequin mibi tabadte tantiata. ¹³Ënden
tsusedpabo chieshëmete icpampid abi
iquec. Adaidd natiateguic icnuc
chieshënushe queshun Nuquin Papan mibi
tantiaquin uidën uac mibi icsainquio yec
chieshtoenquio yec dayacquio iquendac.

**Nuquin Icho Esuquidistu unësaid
tantiaquin acshumbic mayan icsa
tantiaquin mimbi actiapimbo
iquec quiaid**

¹⁴Nuquin Papan chiaid niacmane
quiash, Nuquin Papan uaidbimboecnuc

matsesën nacenaid tantianu, quenda.
Dacuëdec cuenacximboec aid nanacno
nidenda. ¹⁵Tantiabenquid icsho mibi
chiec nebi. Pabadon chiaid abimbo
iquec quequin tantiec aid nanacno
nidenquio yec Esuquidistu chuibansho
tantiec iccuededeneta. ¹⁶¿Iccuededquin
sicaidd acnun Nuquin Papa chiec
onqueshun acted-actedquin matses
icsaquid icsho cuidnushe quiaish abided
cuidadec Esuquidistu intac
chididiquiaid tantien icquinda nuqui
acti? ¿Adembidi, pete cuësh-cuëshun
Nuquin Papa chiec onqueshun aton
dada mëyanaid tantien icquinda nuqui
pedi? ¹⁷Esuquidistubëd abentsëc
yacximboecquido nebi, quequin
tantiaquin pete cuësh-cuëshun meniac
abentsëcshun piacximboen abi tantiec
iccuededquidon pebededec.

¹⁸Aden nuqui pebededacximboen
isadaiddo icsaidd cuidnuen nidaidën
capuquidded cuesuniaidd pambid
tauiquin Nuquin Papan shëdtequid
pambid bedshun cuesunequidbëdtan
nidaidën capuquid icbon pepanëdash.
¹⁹Aden ëmbi chiac ¿atotsi Pabado ëbi
tantiamete bumpec, quepecta mibi
ique? Mibi naden tantiamembique.
Tantia. ¿Nuquin Papan uaidbimboecnuc
matsesën nacenaid tibopecta iquec?
Padenquio. ²⁰Adec adquid tiboquesa
icnuc mayan icsa tantiaquin Esuquidistu
tantiesan Nuquin Papan
uaidbimboecnuc matsesën nacenaid
yacnoshon pambid dasanec. Aden aid
pambid penu, queshun mayan icsabëd
yacximboecquid nebi, quequin pec.
Adquidbëdtan penda. ²¹Nuquin Icho
Esuquidistu unësaid tantiaquin acshun
mayan icsa tantiaquin actiapimbo mibi
iquec. Adembidi, Esuquidistu unësaid
tantiaquin pete peshun mayan icsa
tantiaquin pambid petiapimbo iquec.
²²¿Aid tantiaquin acshun pequin

Nuquin Papa nëishmenquioda mimbi icti? Ai, abitedi tantiaquidquio icquin abitedi isquidquio icquin Nuquin Papan mibi cuidendac.

**Ëmbi natemaïd naden nata caïd nibëdec,
quiash nanueboedi Esuquidistu
tantiaquid utsi icsamemane quiash
nainquiocte chiaïd**

²³Nëïd mishtemaïd nec. Nëïd petemaïd nec. Nëïd actemaïd nec, quequin ëmbi chuitequid nibëdec, quiash Esuquidistu tantiaquid utsi icsamemane quiash nainquio yec tsadebi. Matsesën ambi nacnenaïd tantiaquin pambid dasanaïd ëmbi tantiacmaïd nec, quiash pambid dasanaïd petiadquio iquequi Esuquidistu tantiabenabictsëcquidën, Nëïd nacnenaïd nuquin papa caïd nec, quequin penushe quiash penquio yec tsadebi. ²⁴Utsi tantienquiocquin nacnenaïd pambid dasanaïd piash bëdambo iquebi, quenda. Naden natiaïd. Matsesën nacnenaïd pambid dasanaïd ëmbi pesho isun utsibon icsamboen tantiatsiash, quequin penda.

²⁵Aton na sambededacno nidshun pambid bednuequin, ¿Nuquin Papan uaidbimboecnuc matsesën nacnenaïd pambid dasanaïd bedaidta nec? quenquiocquin bedta. ²⁶Abu nidaïdbëdta uashun aïdënquio icquidtedi Nuquin Papan uampidquio nec. Aïdtedimbo aton na nec. Nacnenaïd yacnoshon pambid sambededaid aton na nec. Aïdën bacuëbo iquec aid pambid pequido mibi nec. ²⁷Aden tantiec Esuquidistu tantiesan, Pec cho, cac, Ai, quianec nidec puduedshun, Mimbi codocaid matsesën nacnenaïd tantiaquin pambid dasanaïd bedaidta nec, quenda. ²⁸Adnubien mibi puduedacno isedquid utsi Esuquidistu tantiabenabictsëcquid

tsadquin, Matsesën nacnenaïd papa cain cuënaïd tantiaquin dasanaïd nëïd pambid nec, cac aid pambid penda.

²⁹Ëmbi papa cain cuënaïd nec, quequin utsin tantianushe qeshun aid pambid penda. Matsesën nacnenaïd con pa nec, quequin cuënaïd tantiesan icquin ¿atotsieshumbimbi matsesën nacnenaïd tantiaquin pambid dasanaïd penquio iqueque? Chuinu. Tanta. ³⁰Nuquin Papa ëmbi tantiaquidquio icnuc penun aïdi chuïsho isash ¿atotsieshun matsesën nacnenaïd papa cain tantiaquin pepec utsibo quepec?

³¹Edoen utsibo tantiamenuen bëdamboen nabanec tabadteneta.

³²Aden naic, Esuquidistu tantiaquid isadaïdbo isadaïdpembobëdta Esuquidistu bëdamboen tantiabemequiono, quec bëdamboec tabadta. ³³Naden naic ëbibi bëdambo iquebi, quenda. Naden ëmbi nabanuc ëbëdi utsi bëdambo ictsiash, quequin tantiata ma Nuquin Papa yacno puduedtequid utsibo yanu qeshun.

11 ¹Ambia tantiaquidën Esuquidistun icmiacpadquiec tabadec nebi. Adecbidi ëmbi chuiquin ismiacpadquiec tabadteneta mibitedi.

**Nuquin Papa tantiaquin
iccuededquin naïd**

²Mimbiana tantianëdaïdquio mibi nec, quequin mimbi chiaïd tantiaquin nabanec nebi, quequin mimbi dada uashun bëmiaïd isash bëdambo iquebi. Adembidi, Esuquidistu tantiabenëdaïdon chuïbanaïd mimbi chiacpadomboen tabadec, quequin mimbi dada uaid bëmiaïdon chuïbansho tantiash bëdambo iquebi.

³Mimbi natequid utsi chuinu. Tantiata. Abi tantiaquid chuïquid Esuquidistu nec. Adembidi chido chuïquid dada nec. Adembidi

Esuquidistu chuiquid aton Papa, Nuquin Papa caid, Edoen nec. ⁴Adquid Nuquin Papa nec, quequin, Aid chuinu, qeshun aton mauete chicquid dadan. Aid chuinen mauet tabadquin, Ēbi chuiquidpenquo Esuquidistu nec, quiacbimboen ismequid nec. Adembidi Nuquin Papan chiaid tantiamequin chuibanquidēn aton mauete chiquec. ⁵Chidoen, Ēbi chuiquid Esus nec, quequin ismec mapucudash tsadec. Adec mapucudenquo yec tsadquin Esuquidistu tantiaquido iccuededacnoshon Nuquin Papa chienda chidon. Adembidi anoshon Nuquin Papan chiaid chuibanenquo ictiad. ⁶Ēbi chuiquid nibēdec, quiacbimboec tabadsho matasmetiad. Matasmiash ma mapucudpanu chido. ⁷Nuquin Papa aton madobēd onquec: Nuquibimboecnuc matses uanuna, quiampicpaden dadaba uapampic. Nuquin Papabimboec icquid nebi, quiaish tsadquid dada. Ēbi chuiquid Abia Yampid nec, quequin ismenuec aid chiech onquec mauete mauesa dada nec. ^{8,9}Dadaba Nuquin Papan uapampic. Dadabēd icquid uanuna qeshun dadan shictodo chicshun chido uashun, Mibēd nashunanquid nec, quequin dada menepampic. ¹⁰Adquid icmiac dada ēbi chuiquid nec, quequin nashunec chidon. Adsho isash Nuquin Icbon abi yacnoshon uaido, mayan bēdabo abi chuiquid chieshēnenquo yec Icbon chiacpadquiech tabadec. ¹¹Nēid chido nec. Nēid utsi dada nec, quenubi nashunanquid abi daēdi nec. ¹²Dadan shictodo chicshun chido uapampic. Adecbidi chidon tishaid dada nec. Ambi tantiampicpaden Nuquin Papan naidtedi nec. ¹³¿Nuquin Papa chuinuec ēbi chuiquid nibēdeque. Matasadnu quiaish chido bēdamboda icpadic? ¹⁴Chido isadacpadec isadnu quec icsambo dada

ictsiash. ¹⁵Chido isadacpadec dada icsho isash, Chido nec, quetsiash. Dada isadacpadec chido isadenquo iquec.

¹⁶Ēmbi chuiboed tantiash, Icsamboen chiosh, quetsiash. Adquid naden chuinu. Tantia. ¿Ēmbentsēquidambi aden chie? Padenquo. Ēbipadquiocquin chuibenequidon adomboembidi chuibanec. Adembidi Esuquidistu tantiech iccuededquid utsibon tantiabededec.

**Nuquin Icbo unēsash uincuenaid
tantiaded-tantiadedta quiaid**

¹⁷Adecbidi, Mimbi naidtedi bēdambo iquec, quetiapimbo iquebi. Adquid chuinu. Tantiata. Esuquidistu tantiabenquid utsibo icmenu, quenquo yec mibi iccuededec.

¹⁸Abentsēc yacbimboec iccuededesa Esuquidistu tantiaquido Codinto yacnocquido nec, quiosh. Adsho tantiash, Abimbo capec, quiobi. ¹⁹Nēidtedi Ēmbi bēdamboen isaido nec. Utsitedi Ēmbi icsamboen isaido nec, quiaish cuēshēdacbimboec mibi tabadcuededec. ¿Adec tabadshoda Nuquin Papan mibi bēdamboen ispec? Padenquo. ²⁰Adec tabadquin Esuquidistu unēste tantienquiocquin utsin-utsinquien peshun acted-actedec. ²¹Utsibo cainenquiocquin abia choquidon nua pebededec. Adoac utsibo choash bunec tabadnubi abia choquido paēmboquid nua acash tantienquo yec tabadec. ²²¿Min nuntan pete nibēdpecta iquec? Mitsana iquec. Adec mitsana min shubuno icnuc ¿Esuquidistu unēste tantiech utsibobēd iccuedednu, quenquiocquinda mibia choshon pebededpe? ¿Natiamianquiech pete nibēdchitec pete nibēdquid camenuenda mibia pebedede? Aden pebededquido ¿atotsimbi chuipe? ¿Bēdamboen mimbi nabanec quepectabi ique? Padenquo. Aden naquin Esuquidistu unēsaid tantienquiocquin mimbi pec.

²³Nuquin Icbon chiapadomboen mibitedi chuibanondambique. Tantiata. Chuinu. Nēid inchēshēmbi ēbi chieshēnquido ēbēd icquidēn ēbi bedmendac, quequin Esuquidistun abi unēste tantiaquin nadopanēdash. Pete bedshun ²⁴Nuquin Papa chuishun cuēsh-cuēshun naden abēd icquido chuipanēdash: “Pete cuēshaid bedash matses icsaquid icsho cuidnushe quiash ēbēd cuidadec unēste tantiaquin pebededta,” quepanēdash Esuquidistu. ²⁵Aden chuishumbic aid pebededsho isun pete utsi pebededquin nainshun adembidi dēshote bedshun sananquin naden Esuquidistun chuipanēdash: “Esuquidistu unēsquin ēbi chian anēdēnquiacno nēsecatequid icsho mēnchitequid Esuquidistu iquec, quequin tantiaquin sicaid acbededta. Sicaid acquin ēbi mēnchitequid iquec quequin tantiaquin acban.” ²⁶Aden Esuquidistun ismenēdacpadomboen pete cuēshēmpi pebededshumbic sicaid acbededta. Nuquin Icho unēsaid tantiaded-tantiadedquin aid padpidec choabicnuc adobanta. ²⁷Abi unēste tantienquiocquin pete cuēshun peshun acquin Esuquidistun chiaid niacquid nec. ²⁸¿Pete cuēshēmpi penun Esuquidistubēd tabadacpadquiectabi tabadpe? quequin mibi utsibēd tabadte tantiata. ²⁹Esuquidistu unēsaid tantienquiocquin peshun acquid Nuquin Papan cuidendac. ³⁰Aden adquidon peshun acac utsi-utsiec padishec; utsi-utiec daicsambo yanec; utsi dadpen ēnden unēsac. ³¹¿Adabi Nuquin Papan chiaid niaquenquio yec tsadpe? quequin tantiec tsad. Aden tantiec tsadshumbic, Icsaobi, Papa, qeshun mibi icsaid chuiban. Aden chuishun Esuquidistu unēsaid tantiaquin pete peshun sicaid acta. Aden mibi icsaid chuishun pesho isun Nuquin Papan mibi natiaic

camenquio iquendac. ³²Adesa icsho Nuquin Papan natiaic camiaid mibi iquendac. Abi tantiesabēdta chian anēdēnquequid nēsecadenquio mibi icmenuen Nuquin Papan mibi natiaic camec ma ēmbi chiapadomboen nabamenuequin. ³³Adembidi Esuquidistu unēsaid tantianuec iccuededquin utsibo choabi iquec quequin aido cainta. ³⁴Bundoshon min nuntanshun pe. Aden pesho isash, Icsamboen naique. Cuidnu, quetiapimbo Nuquin Papa iquec.

Padi. Esuquidistu unēsaid tantianuequin naden nata quequin chiombi. Mibi yacno nidash puduedshun ēmbi chuiboed daēd uain chiendambi.

Nuquin Papan Mayanēn tantiamiaid

12 ¹Nuquin Papan Mayanēn tantiametequid chuinu. Tantiata. ²Ēnden mibitedi Esuquidistu tantiesa yec Nuquin Papan uaidbimboecnuc ambi nacenaid matsesēn ismec, Nēid papa cain cuēnaid nec, qesho tantiaquido mibitedi iccondac. ³Adquid iccondaidi Esuquidistu tantiaquid mibi yanacsho naden chiembique. Tania. Nuquin Papan Mayanēn tantiamiaido: Esus Nuquin Icbopenquio, Nuquin Papan Chomiacmaid nec, quetiapimbo adquido iquec. Adecbidi, Nuquin Papan Mayanēn tantiamiacmaido: Esuquidistu con Icho nec, quetiapimbo icoaic.

⁴Nuquin Papan Mayanēn, Naden nata, quequin tantiametequid Esuquidistu tantiaquido iquec. Adec ambi tantiametequid dadpen icnubi aid abentsēcquiobi tantiamianquid Nuquin Papan Mayan nec. ⁵Adecbidi, utsi nashunquido Esuquidistu tantiaquido icnubi utsi nashunquidon Icho abentsēcquiobi Esuquidistu nec.

⁶Adecbidi, nadatiambocquin nabanquid utsi-utsiec icnubi Nadatiambocquin namianequid abentsëcquiobi Nuquin Papa iquec.

⁷Esuquidistu tantiaquid utsibëd tantiananquin namenu, quequin aton Mayan Nuquin Papan nuqui menec. ⁸Nuquin Papan Mayanën tantiamiac ambia comapenen tantiaquidquico icquin chuibanquid utsi-utsiec iquec. Nuquin Papan Mayanën tantiamiac ambi tantiaid chuibanquid utsi-utsiec iquec. ⁹Nuquin Papan Mayanën tantiamiacpaden ëmbi chiacpadomboen Nuquin Papan naic, quequin tantiaquid utsi-utsiec iquec. Nuquin Papan Mayanën tantiamiac bédamequid utsi-utsiec iquec. ¹⁰Nuquin Papan Mayanën tantiamiac nadatiambocquin nabanquid utsi-utsiec iquec. Nuquin Papan Mayanën tantiamiac Nuquin Papan nanun chuipampid tantiaquin chuibanquid utsi-utsiec iquec. Nuquin Papan Mayanën tantiamiac matses bédamboec tabadsho isash, Nuquin Papan Mayanën tantiamiaid nec, quequin tantiaquidquico utsi-utsiec iquec. Ademibidi, utsi icsamboec tabadsho isun, Mayan icsan namiaid nec, quequin tantiaoaic. Nuquin Papan Mayanën tantiamiac nidaidën icquid onquiacmaidën onquequid utsi-utsiec iquec. Ademibidi Nuquin Papan Mayanën tantiamiac nidaidën icquid onquiacmaidën onquesho tantiaquidën tantienquiocsho isun aidon onqueten chuibanquid utsi-utsiec iquec. ¹¹Aden Nuquin Papan Mayanën tantiamiac nabanquido nuquitedi nec. Ambi tantiacpaden abentsë-abentsen Nuquin Papan Mayanën aden tantiamec.

Dada abentsëc yacpadquie Esuquidistu tantiaquidtedi iquec

¹²Uidënaid dadpen icnubi matsesën dada abentsëc iquec. Adquibidi

Esuquidistu tantiaquid dadpen icnubi ambi tantiaid abentsëcquiobi Esuquidistu iquec. ¹³Ad icnuc isadaidbo yec isadaidpembo yec utsin yuaid yec utsin yuacmaid yec quec Esuquidistu tantiaquid iquec abi tantiaquido nuquitedi iquec. Adquid nuqui icsho Nuquin Papan aton Mayan meniaido nuqui nec.

¹⁴Matsesën dada abentsëqui icnubi uidënaid dadpen iquec.

¹⁵¿Médantepadquidpenquico yec matsesën dada uidënacmaidta taë icpec? Padenquico. Dada uidënaid taë iquec.

¹⁶Adecbidi, ¿ëshëpadquidpenquico yec matsesën dada dëccuësquiacmaidta dëbiata icpec? Padenquico. Dëbiata dëccuësquequid iquec. ¹⁷Matsesën dada ëshëuidpambo icquin ¿atontsin tantiapatsiash? Adecbidi, aton dada pabiateuidpambo icquin ¿atontsin shëdpatsiash? ¹⁸Nuquin Papan tantiampicpadquiequi matsesën dada uidënaid nec. ¹⁹Dëccuësquequid abentsëc icnuc dada nec quetiapimbo iquec. ²⁰Uidënaid dadpembëd dëccuësquequid dadpen icnuc matsesën nami abentsëqui iquec.

²¹Matsesën dada ad icnuc, ¿Médante bédambo icnubi ëshë padenquico iquec, quepecta mibi ique? Padenquico.

²²¿Isadesa uidënaid uquëducquid nibëdnuc matsesën dada bédamboda icpatsiash? ²³Uidënaid uquëducquid ismenquiocquin ompoaidquico utsi nec.

²⁴Nami isaidquico ompodesa nec. Nuquin Papan tantiampicpadquiequi ompoaid nibëdnuc matses cuëdenquico yec unësec. ²⁵Ad icnuc, Icsambo icmianeque. Tësnu, quetiapimbo icbo iquec. Ompoaid ompodesa aidbëdi iquec bédambo yec nashunanquid aidtedi nec. ²⁶Abentsëc paëmbo iquec matsesën dada bédambo iquenquico iquec. Adquidtedi bédambo iquec

matsesën dada abichobi paëpenquo
iquec. Adecbidi, Esuquidistu tantiaquido
abentsëc yac bimboec iquec abentsëc
icsacsho isash abitedi unësquo iquec.
Abentsëc, Bëdambo iquebi, quenuc
aidbëd abitedi bëdambo iquec.

²⁷Adquidtedi matsesën dada abentsëc
yacpadquieq Esuquidistu tantiaquidtedi
aidën dada abentsëc yac bimboecquid
nuqui nec. Abi tabadtequid iquec. ²⁸Abi
tabadtequid nadquid iqueque. Chuinu.
Tantia. Ambi chiacpaden ambi ëbi
chui beneta caidoba iquec. Nuquin
Papan chuipampid comapenen
tantiaquin chuibanquid utsi iquec.
Esuquidistu tantiaquid icsho isun nadec
tabad quequin chuibanquin ismequid
utsi iquec. Nadatiamboquin nabanquid
utsi iquec. Bëdamequid utsi iquec. Utsi
nashumbanquid utsi iquec. Esuquidistu
tantiaquid iccuededquido namequid utsi
iquec. Abi onquiacmaidën onquequid
utsi iquec. Adquidtedi nuqui iquec
abentsëc yac bimboec nuqui tabadec.
²⁹¿Esuquidistu tantiaquidtedida ambi
ëbi chui beneta caid icpadic? Padenquo.
¿Esuquidistu tantiaquidtedida Nuquin
Papan chiampid comapenen tantiaquin
chuibanquid icpadic? Padenquo.
¿Esuquidistu tantiaquidtedida, Nadec
tabad, quequin ismequid icpadic?
Padenquo. ³⁰Adecbidi, ¿Esuquidistu
tantiaquidtedida bëdamequid icpadic?
Padenquo. ¿Esuquidistu
tantiaquidtedida abi onquiacmaidën
onquequid icpadic? Padenquo. ¿Utsi
onquiacmaidën onqesho tantiaquidën
tantienquiocsho isun aidon onqueten
onquequin chuibanquidtedida icpadic?
Padenquo. ³¹Nuquin Papan Mayanën
tantiamete utsi-utsiec icnuc, ¿Atotsibi
icte bumpe? quequin tantiaquiota.
Esuquidistu tantiaquid
tantiabemenuequin ëmbi abia
chuibambocpadquid icte bunquiota.

Utsi tantiaquidquo

Ëmbi chuiboedtedi Esuquidistu
tantiaquido Nuquin Papan Mayanën
tantiamete bëdambo iquec. Padnuen
ambi tantiamequin bëdamboshë
icmetequid iqueque. Aid
tantiauidquidba chuiboshombic aid
tantiaquidquo chuinu. Tantiata.

13 ¹Matses utsi-utsiecquid
onquiacpadquieq anquiadquid,
adecbidi Nuquin Papan abi yacnoshon
uaid, mayan bëda onquiacpadquieq
onquequid icquimbi utsi tantiesa icquin
chuibansho abipenquo chuisho utsibon
tantiendac. ²Utsibic, Nuquin Papan
Mayanën tantiamiac chuibanquid
adembidi Nuquin Papan chienquo
icampid Nuquin Papan Mayanën
tantiamiac tantiaquid aidi niosh.
Aidëmbidi Nuquin Papa
nadatiamboquin naquidquid nec,
quequin tantiaquin, Mananuc macuësh
dapa icboedi acte nantan nënitsinoac,
Papa, cacpadomboen nënitsinoac
nidquid isquid icquimbi utsi tantiesa
icsho, Bëdambocquid mibi nec, Nuquin
Papan catiapimbo iquec. ³Utsibic, aton
na nibëdsho menequidquo niosh.
Adembidi, Esuquidistu tantiesa nebi
cata, cac padenquiocsho mëyanaid
niosh. Adquid icquimbi utsi tantiesa
icsho, Bëdamboen mimbi naoc, Nuquin
Papan catiapimbo iquec. ⁴Padnuen
Nuquin Papan Mayanën bëdamboshë
ictequid tantiamiaid nadquo iqueque.
Chuinu. Tantia. Utsi tantiaquidquo utsi
tantiamequionueq chushcanesa nec. Utsi
tantiaquidquo nashundenequid nec.
Utsi tantiaquidquo utsin na isash
adquidquo con na bëpashun quesa nec.
Utsi tantiaquidquo dëniacanquidquo
yec dëniacanquidquo nebi abibi quesa
nec. Utsi tantiaquidquo ëbentsëqui
tantiaquidquo nebi quiacbimboen

nabanesa nec. ⁵Utsi tantiaquidquio utsi icsamboen tantiaquin nabanesa nec. Utsi tantiaquidquio, Ĕmbentsēqui tantiacpadomboenuidi utsitedishun nabantiad, quesa nec. Utsi tantiaquidquio badedquio nēishesa nec. Utsi tantiaquidquio abi icsamboen nasho cuidesa nec. ⁶Utsi tantiaquidquio utsi icsambocsho isash, Unēsquio iquebi, quec tsadquid nec. Adecbidi, utsi bēdambochsho isash, Bēdambo iquebi quec tsadquid neoaic. ⁷Utsi tantiaquidquio utsi icsaid chienquio yec tabadquid nec. Utsi tantiaquidquio ambi nanaid nibēdsho isash ampiash badedquio quenquio yec ŷmitsimboembi nampoba? quec onquequid nec. Utsi tantiaquidēnquio utsi icsadenesho isun, Tantiamic Nuquin Papan chiacpadomboen natsiash, quequin chuibanendac. Aden chuishun bēdamboen nasho isnuen cainquid nec. Mēyanaqui chieshenquio yec dayacquio yec tabadtenequid utsi tantiaquidquio nec.

⁸Utsi bēdamboen tantiaid ēnēdtiapimboctequid nec. Nuquin Papan chiaid chuibantsaidien ēnēdendac. Adecbidi, matses onquiaidtedi ēnēdendac. Adecbidi Nuquin Papan ambi uaidtedi ěmiac matsesēn isquin tantiaid ēnēdoaic. ⁹Nabanaidtedi tantiabenabictsēcquidquio nuqui nec. Adecbidi Nuquin Papan chiampidtedi tantiabenabictsēcquidquio nuqui neoaic. ¹⁰Nidaidēn tabadquin aitedi tantiabenabictsēcquidquio nuqui icboedi Nuquin Papa yacno puduedash abitedi tantiaquidquio nuqui iquendac. ¹¹Bacuē yec bacuēmpi onquiacpadec onquepadenebi. Adembidi, bacuēmpin tantiabenabi yacpaden tantiapadenembi. Adquid icquin caniaidēn tantiacpadpenquiocquin

tantiapadenembi. Adquid icboedi caniaish bacuēmpin tantiacpadpenquiocquin tantiabēnondambi. ¹²Nēbi isnanten bēisadquin Nuquin Papabimboecquid nuqui isec. Yuecshun abi yacno puduedshun aidquibidi Edoen Nuquin Papa nuqui bēistuidendac. Nēbi Nuquin Papa isenquiocquimbi ambi chiaid tantiatsembi. Ambi tantiacpaden yuecshun bēisquin nuqui tantiabēnendac aid.

¹³Nidaid ēnēdnuc nēidtedi ēnēdtemaid iqueque. Chuinu. Tania. Ambi chiacpaden nabanquidquio Nuquin Papa nec, quequin tantiaid ēnēdtemaid nec. Adecbidi Nuquin Papa yacnoēsh abipadquid bēdambocquidquio iquendabi, quequin cainquin tantiaid ēnēdtemaidquio nendac. Adecbidi, utsi tantiaid ēnēdtemaidquio neaindac. Aidedi ēnēdtemaid icnuc nidaidēn tabadquin, Utsi tantiembi, quequin ismiac utsi dadpen Esquidistu tantiaquid yanash mibēdi Nuquin Papa yacno tabadendac. Adquid bēdamboshēcquid nec.

Mimbi chiaid chuibanquid ēbi icme, Papa, quaid

14 ¹Utsi tantiaquid icta. Nuquin Papan Mayanēn adquid icmioshi, quequin ambi tantiamete utsi bunquiebique. Adece bunsho mimbi chiaid comapenen bēdamboen chuibanquid ēbi icme, Papa, quequin chuiban. ²Aden tantiamiac tantiamenu qeshun tantianuequidēn onqueten chuiban. Aton onqueten onquenquiocsho aidon tantienquio iquec. Padnuen onquiaidtedimbo Nuquin Papan tantieque. Aden nidaidēn icquid onquiacmaidēnquio Nuquin Papan Mayanēn tantiamiacpadec onquequin Nuquin Papa chiec onqueta.

³Ma Esuquidistu utsibon tantiabenu, queshun Nuquin Papan chiaid chuibanec. Adembidi matses ma bēdamboec tabadnu queshun chuibanec.

⁴Nuquin Papan Mayanēn tantiamiac nidaidēn icquid onquiacmaidēn onquequin onquequiduidtsēqui tantiabenquid yanec. Padnuen Nuquin Papan chiaid Nuquin Papan Mayanēn tantiamiac Esuquidistu tantiaquido ma Nuquin Papan chiaid tantiabenu queshun chuibanec. ⁵Nuquin Papan Mayanēn tantiamiac nidaidēn icquid onquiacmaidēn Esuquidistu tantiaquidtedi onquepashun. Aden chuishumbic adec onquenquiocquin Nuquin Papan chiaid chuiban caimbi. Nuquin Papan chiaid comapenen tantiaquin chuibanac Nuquin Papan chiaid utsibon tantiabenendac. Padnuen nidaidēn icquid onquiacmaidēn chuibanac tantianuequidēn tantienquio iquendac. Aden tantienquiocsho isun abi daēdi onquiaid tantiaquin chuibanquid nibēdnuc nidaidēn icquid onquiacmaidēn chuibanenda caimbi.

⁶Adembidi chuinu. Utsibon tantia. ¿Mibi yacno choash puduedshun nidaidēn icquid onquiacpadec onquenquiocquin ěmbi chuibansho tantienquio yec, Bēdambo iquebi, quecta mibi tabadpe? Padenquio. Nuquin Papan chiaid dada uamiampid min onqueten ěmbi chuibansho mimbi tantiabampec. Min onqueten chuibanenquio yec ěbibi onquiacbimboecsho mimbi tantienquio ictsandac. ⁷Shoncatempi abibi shoncadiapimbo iquec. Adembidi, aid shoncaisan shoncasho tantiatiapimbo utsin iquec. Adembidi aid cuēdēmesan tentencate cuēdēmesho tantias, Adomboen cuēdēmenquio iccosh, quec. ⁸Adembidi, utsibo yacno ma cuesnanu queshun chomenuequin sondadon

tantiabocpadpenquiocnoc shoncac choenquio iquec. ⁹Adecbidi, utsi onquiacmaidēn onquequin chuisho ¿mitsipaden tantiapatsiash? Utsibon tantienquio iquec. Aden chuibanec nibēdacno onquiacbimboec onquepec.

¹⁰Onquete utsi-utsiec dadpen iquec. Aton onqueten onquequin chuibansho matsesēn tantiec. ¹¹Utsin onqueten chiac tantiatiapimbo yec, Onquequin chuibanquid con matsespenquio nec, quequin tantiec. ¹²Ad icnuc, Nuquin Papan Mayanēn ěbi tantiamepēc, queshun, Esuquidistu tantiaquido ma tantiabenquido yampanu queshun mimbi chiaid chuibanquidquio ěbi icme, Papa, quequin Nuquin Papa chuita.

¹³Nidaidēn icquid onquiacmaidēn onquequid nebi, quequin tantiec. Adec onquequin chuibanquin iccuededquidon onquetenquio ěmbi chuiboed chuioaquid icme, Papa, ma tantiapanu, quequin Nuquin Papa chuita. ¹⁴Nuquin Papa chiec ěbi onquiacmaidēn onquesho utsibon tantienquio iquendac. ¹⁵Aden abi onquiacmaidēn onquequin utsibon tantienquio icsho ¿mitsipadentsimbi tantiamepe? Naden naimbi. Iccuededquido onquiacmaidēn onquequin Nuquin Papa chuishumbic tantiamenun iccuededquidon onqueten onquequin chuibanoanuna. Adecbidi, iccuededquid onquiacmaidēn Nuquin Papan naid chiec cuēdēnashic tantiamenuec iccuededquidon onqueten cuēdēnoanuna. Adembidi abi onquiacmaidēn onquequin chuibanshun iccuededquidon onqueten chuibanoatiapimbo iqucin abi onquiacmaidēn onquequin chuibanenquio iquembi. Adecbidi abi onquiacmaidēn cuēdēnenquio iquebi. ¹⁶Iccuededquido onquiacmaidēn onquequin Nuquin Papa chuibanuc ¿mitsipadec, Ai, abimbo iquec, quepec

aido? Aton onqueten onquequin Nuquin Papa chuibansho tantiash, Mibi bédambo iquec, Papa, quequin chiendac. ¹⁷Abi onquiacmaidèn onquequin Nuquin Papan nabod chuibanac Esuquidistu tantiadonequidquio mibéd iccuededquido yantiapimbo iquec.

¹⁸Ëbibi utsin-utsinquec onqueten onquequidquio icnubi mibitedi adesa nec. Padnueni adec onquec bédambo iquec, Papa, quequin chuided-chuidedembi. ¹⁹Padnuen chuinuec Esuquidistu tantiaquido iccuededacno puduedash ma tantianu quiaash aton onquete daëdpactséc tantiash anquiadquid icquin aidtedictsèqui chiendambi aido onquiacmaidèn onquenquiocquimbi.

²⁰Adembidi chuinu. Utsibon tantia. Bacuëbo tantiabenabictsècquid yacpadquec icsaid tantiesa icta. Ènden caniaidèn tantiabenshun ismiacpaden bédamboec tabadquin ismeta. ²¹Nuquin Papan chiampid nad iqueque. Tantia: “Èmbi chuiban cac aton matsesèn chuibanac tantiante bunesa icquin niacquid isadaidbo niosh. Adshobimbi matses utsi yuamiac isadaidbo onquiacmaidèn onquequin chiac tantiesa icquin èmbi chiacpadomboen nate bunenquio icoaposh,” quequin Nuquin Papan dada uamiampid nec.

²²Adoaidi Nuquin Papan Mayanèn tantiamiac abi onquiacmaidèn onquequin chuibanquin Nuquin Papan chiaid tantiabenquid Esuquidistu tantiaquid icmetiapimbo iquec. Padnuen adec onquequin chuibansho tantiash, Nuquin Papan naid nec, quequin Esuquidistu tantiesa icboedi abi tantiaquid yantsiash. ²³Padnuen Esuquidistu tantiaquido iccuededacno Esuquidistu tantiesa puduedshun abi onquiacmaidèn abitedi onquecuededsho

tantiash, Aidon tantiante icsabudpash, quepec. ²⁴Padnuen Esuquidistu tantiaquido iccuededacno Esuquidistu tantiesa puduedshun aton onqueten abentsècshun-abentsècshunquien Nuquin Papan chiaid chuibansho tantiash, Icsaobi. ²⁵Nèbi èbi bédambo icmequid Esuquidistu tantiante bunebi, qeshun abi icsaid ambi chienquicboed Nuquin Papa chiasic, Nëmbo iccuededquidobéd mibi iquec, Papa, quequin chuibampec Esuquidistu tantiaquid yanshun.

Abentsècshun- abentsècshunquien chuiban, quequin chiaid

²⁶Adembidi chuinu. Adembi tantiata. Esuquidistu tantiaquid iccuededec cuëdènu, utsi quenubien; Nuquin Papan chiaid tantiamequin chuinu, utsi quenubien; naden Nuquin Papan ismioshibique. Chuinu, utsi quenubien; mibi onquiacmaidènquio onquequin chuinu, utsi quenubien; mibi onquiacmaidèn chuisho tantiombique. Min onqueten chuinu, utsi quetsiash. ²⁷Aited, Chuinu, qesho òmitsicquid chuita nuqui cape? qeshun naden chiac bédambo ictsiashe. Chuinu. Tantia. Mibi onquiacmaidèn onquequin chuinuequid daéd icnuc bédambo ictsiashe. Abentsèc chotsècnuc adecbidi bédambo ictsiashe. Aited icquin abentsècshun-abentsècshunquien onquequin chuiban, cata. Aden abentsècshun onquequin chuisho abi onquiaid tantiaquidèn iccuededquidon onqueten chuibanta, cata. ²⁸Padnuen abi onquiaid tantiaquin chuibanuequid nibèdnuc, Tsadquin Nuquin Papauidi otacquiocquin chuita, cata.

²⁹Adecbidi, Esuquidistu tantiaquido iccuededacno Nuquin Papan chiampid comapenen tantiaquin chuibanquid daéd icnuc bédambo ictsiashe. Abentsèc

chotsēcñuc adecbidi bēdambo ictsiash.
Aided icquin abentsēcshun chuibanubi,
¿Nuquin Papan Mayanēn
tantiamiacpadomboenda chuibaneque?
Isnu, quequin chuibanequid utsibon
Nuquin Papan chiaid isban. Adembi,
utsin chuibanubi adomboembidi
isbanoaic utsibon. ³⁰Abentsēcshun
chuibanubi Nuquin Papan Mayanēn
tantiamiac utsi: Ēmbitsen chuibanu,
quesho tantiasun ma aidēn chuibanu
quiash ambia chuibanquid ēnēd.

³¹Adquidēn iccuededquidtedi
tantiamenuequin
abentsēcshun-abentsēcshunquien
chuibanta. Aden chuibansho tantiasun
ma chieshenquio yec bēdambo icpanu.
³²Nuquin Papan Mayanēn tantiamiaid
utsibēd bēdamboec tabadquid nec.

³³Nuquin Papan tantiamiacpadequi utsi
onquenubi onquenquio utsibo tabadec.
Onquenu, utsi quenuc, Ai, onqueta,
quesun onquenquiocquin cainec
tabadec chuibanequid utsibo.
Esuquidistu tantiec iccuededquido
utsi-utsiec yacnocquido adecbidi
tabadquido nec.

³⁴Esuquidistu tantiaquido
iccuededacno otacquo tabadquid chido.
Chuibanacnoēsh onquenu, quenda
chido. Nuquin Papan chiapadec ēbi
chuiquid dada nec, quec chido.

³⁵Anoshon chiaid tantienquio yec
tsadquin cainec shubuno nidash,
Tantienquio iccombique. Nuqui
tantiaboed ēbi chui, quesho tantiasun
chiec aton bēnēn. Tantienquiocquin
cainenquio iquec chido icsambo iquec.

³⁶¿Mimbia Nuquin Papan chiaid
chuibanquidoda ne? Padenquio.
¿Chuibanac Esuquidistu tantiaquido
mibitedictsēquida yanondac?
Padenquio. ³⁷Nuquin Papan chiaid
chuibanquidquio nebi, mibi quenuc,
Nuquin Papan tantiamiacpaden

Pabadon chuibanquin dada uaid nec,
mibitedi quepec. ³⁸Aden mimb
tantianubi, Pabadon dada uaosh,
quenquio utsibo icpec. Aido Nuquin
Papan tantiamiacmaido iquec. Adquid
icscho isun, Pabadon dada uaid nec,
quequin tantiamenu, quenda.

³⁹Adembidi chuinu. Adembi tantiata.
Nuquin Papan chuipampid comapenen
tantiaquin chuibante bunquiota. Aden
chuibanquid mibi icnuc utsi
onquiacmaidēn onquequin chuinesho,
Ai, cata. ⁴⁰Adecbidi, Nuquin Papan
Mayanēn tantiamiac chuibanequid
dadpen icnuc utsibo bēdamboen
tantiamenuequin
abentsēcshun-abentsēcshunquien
chuibanta.

Esuquidistu uincuenaid

15 ¹Adembidi chiembique. Tanta.
Matses icsaquid icscho cuidnushe
quiash abided cuidadec Esuquidistu
unēsaid ēmbi chuibansho tantiasun, Ai,
abimbo iquec. Aid tantiembi, mibi
quiampondac. Aden tantiadonec
chieshenquio yec mibitedi tabadec.
²Aden, Aid tantiabenu, quesho Nuquin
Papan mibitedi bēdambo icmenuequin
tauapondash. Mibi chieshenquiocsho
isun adquid icmeshun abi yacno mibi
yuedendac. Padnuen, Esuquidistu
tantiaquid nebi, quequin
abipenquiocnoc chuiquid ambi
bēdambo icmēbanacmaid nec. Adecbidi,
ambi yuednu cacmaidquio adquid nec.

³Utsin ēbi tantiamiacpaden mibi
chuibanondambi. Adembi chuinu.
Tanta. Nuquin Papan chiapadomboen
matses icsaquid icscho cuidnushe quiash
abided cuidadec Esuquidistu
unēsapanēdash. ⁴Unēsacsho shēcūē
nacnenaidēn naudedshun bētashacsho
daēdec ushtanquin ambi chiampicpaden
Nuquin Papan uincuen uapanēdash.

⁵Aden uincuemiach choquin, Uincuenobi, quequin Petedo Esuquidistun ismepanēdash. Adshumbic adembidi abēd 12ted icquido ismeoapanēdash. ⁶Adshumbic adembidi abi tantiaquid dadpen 500ted iccuededsho choquin, Uincuenobi, quequin Esuquidistun ismeoapanēdash. Aid uincuenacsho isquido dadpen abi tabadnubi utsi-utsiec padenquio iquec. ⁷Aden aitedi ismeshumbic aton utsi Santiacotsen Esuquidistun ismeoapanēdash. Adshumbic, ambi ēbi chuibeneta caitedi ismeoapanēdash. ⁸Aden aido ismequin nainshun yuecshun ēbitsen ismeoapondashi. Icsactsēcquiocquid nec, quenquiocquin ismebenondashi tsyuecquio. ⁹Abi tantiaquid mēyanquin cuesunemequidquio icboedi abi tantiaquid yanacsho Esuquidistun, Ēbi chuibeneta, cainquioctiadquidēmbi adquid icta caid nebi. ¹⁰Esuquidistu tantiaquid yansho isun ēbi chieshaid cuidenquio yac Nuquin Papa bunacpadomboen Esuquidistu chuibenequid nebi. Adquid Nuquin Papan icmioshi, quequin chieshenquiocquin ma dadpenshun Esuquidistu tantianu quequin chuibenembi utsibon aden chuibenenquiocnobi. Ĕmbentsēcquidambi chuibenedio? Aton Mayan Nuquin Papan meniac aidbēd icquin chuibeniombi. ¹¹Adembidi, ēbi yacpadquidon Esuquidistu chuibanac utsitsen abi tantiaquido yampondash.

Matses unēsash uincuenaid

¹²Adec Esuquidistu unēsash uincuenondash, quequin chuinubi Ĕmitsipaden tantiec uincuenta nibēdec quec utsi-utsiec onquepec? ¹³Uincuenta nibēdnuc Esuquidistu uincuenenquio ictsempanēdash. ¹⁴Esuquidistu uincuentequid icmiambocnoc abi

chuibanquid muambo ictsiandac. Esuquidistu tantiaquid nebi, quiaidbidi muambo ictsiandac. ¹⁵Nuquin Papan naid chuibanquidtedi muaquidquio icoatsiandac. Aden tantienquiocquin ēbi yacpadquidon chuibanendac. Unēsash uincuentequid nibēdnuc ēbitedishun Nuquin Papan Esuquidistu uincuen uapanēdash quequin chiaid abipenquio ictsiandac. Unēsash uincuenta nibēdnuc Nuquin Papan uincuemiaid nibēdtsiandac. ¹⁶Unēsash uincuenta nibēdnuc Esuquidistu uincuentiapimbo ictsempanēdash. ¹⁷Aid uincuenambo icnuc matses icsaquid icsho cuidnushe quiaish abided cuidadquid Esuquidistu nec, cainquio mimbi ictsiandac. Matses icsaquid icsho cuidnushe quiaish cuidadquid nibēdtsiandac. ¹⁸Aid uincuenambocnoc abia tantiaquido tsusedpabo Nuquin Papa yacno puduedtiapimbo ictsempanēdash. ¹⁹Nidaidēnuidi Esuquidistu tantiec tabadte icnuc abi tantiaquido Esuquidistun bedoanendac quequin caimbudaqui ambi tantiaid choenquio ictsiandac.

²⁰Ĕmbi chuiboedtedi adtiapimbo iquec. Esuquidistu Nuquin Papan uincuen uapanēdash, quequin chiaid abimbo iquendac caimbi. Nuquin Papan ambi abia uincuemiaid abi yacno puduedmequin ambi uincumetequid dadpen iquendac, quequin chiaid abimbo iquec. ²¹Unēstequid bēyuc dada yanampicpadec matsestedi adecbidi iquec. Adecbidi, unēsash uincuentequid Esuquidistu yanacpadec abi tantiaquidtedi adquiobidi iquendac. ²²Bēyuc dada Adan caidēn tsyuecquidtedi adecbidi unēstequido nec. Esuquidistun bēdambo icmiaid uincuentequido neoaic. ²³Esuquidistubimboecquid dadpen iquendac, quequin Nuquin Papan aidba

uincuemiambien yuecshun Esuquidistu choashun abi tantiaquidtedi bedoanendac. ²⁴Aden bedoanquin abi tantiaquidtedi bëyucanec choquin Nuquin Papa Edoen caid ismequin, Nëidtedi min shubu abentsëquën tabadquido nec, quequin chiendac abi chieshënquidtedi chën quetiapimbocnoc. Aido ambi nebudacbimboecquido iquendac. ²⁵Abi chieshënquido utsitedibëd chuiquid icquin abi chieshëntiapimbocquid aido Esuquidistun icmebanendac. ²⁶Adoshombic ënquimbi unëstequid nibëdquidquido Esuquidistun icmeoaindac. ²⁷Adoacsho abitedi chuiquid Esuquidistu Nuquin Papan icmendac. Abi namiaidtedi utsitedi icnubi adquidpenquio aton Papa iquec. ²⁸Aden Esuquidistun namiaidombo abitedi icmeshumbic aton Madotsen Nuquin Papan namiaid iquendac. Adquid abitedi icnuc Edoen Nuquin Papa Chuiquid Dapa Abentsëcquiobi nendac. ²⁹Unësash uincuentequid nibëdnuc, ðatotsieshun, Ënden unësaid uincuenendac, quequin tantiembi quequin utsibon acten ambibi mentomepec? ³⁰Adecbidi unësash uincuentequid nibëdnuc ëbi unës uate utsibo comapenec buncuededsho isun ðatotsieshun, Uincuentequid iquec, quequin ëbi yacpadquidon chuibampec? ³¹Unësash uincuentequid iquec, quequin tantiembi. Aden tantiaquin Esuquidistu, Nuquin Icho, ëmbi chuibanac Esuquidistu tantiaquido mibitedi yampondac, quequin tantiembi. Aden tantiaquin unësmane quenquiocquin Esuquidistu unësash uincuente iquec, quequin chuibenec nebi. Aden badiadquidën-badiadquidënquien chuibanubi ëbi unës uate utsibo bunec. ³²Uincuentequid nibëdnuc, ðatotsi

quenequini Epeso yacnoshon, Uincuente iquec, quequin chuibansho mëyanaqui chieshenquio yec dayacquio tsadpe? quetsiabi. Adecbidi uincuente nibëdnuc: “Unësash nibëdquiec iquebi, quequin nua peshun aquembi,” quetsiabi. ³³Aden tantienquio iquembi. Adembidi tantienda. “Uincuente nibëdec quequidbëd capuenda aidën tantiacpadec icmane quiash.” ³⁴Adquidpadquid icquin mimbi icsamboen tantiaid ënquin Nuquin Papan chiaidquio tantiata. Esuquidistu tantiec mibëd iccuededquid utsi-utsiec, Nuquin Papa nadatiambocquin uincuemianquidquio nec, quequin tantiesha nec. ðAdquid mibëdi icnuc Nuquin Papan bëdambo icmiaido mibitedida icpe? Padenquio.

Uincuemequin dada chuca meniaid

³⁵¿Mitsipadec unësaid uincuempec? utsi quepec. Adecbidi, ¿mitsipadquid uincuentequidën dada icpec? utsi queoapec. ³⁶Adquidën icsamboen tantieque. Chuinu. Tanta. Mimbi tiedën chococaid tauibëd ëshë chococatequid napi dëyuctequidpadpenquio iquec. ³⁷Mimbi tiedën chococaid utsi-utsiec iquec. Adecbidi mimbi tiedën siaid utsi-utsiec iquec. Mimbi chococaid mimbi siaidbidi dëyuctequid utsi-utsiec iquec. ³⁸Nuquin Papan tantiampicpadec aton dada yanec. ³⁹Abipadquidpenquio ambi uaidtedi iquec. Abipadquidquio matsestedi iquec. Abipadquidquio nidaidën capuquidtedi iquec. Abipadquidquio podochuquidtedi icoaic. Abipadquidquio acten icquidtedi icoaic. ⁴⁰Abuc tabëcaid icnubi nidaidën icquid iquec. Abuc tabëcaid abipadquid chënquesho isec nidaidën icquid tabadec. ⁴¹Badiadën ushë comapenquiec chënquenubi inchëshën ushë daebudquio chënquiec. Aid daëdi nua

isadnubi uispa pistsēc isadoaic. Uispa utsi-utsiec iquec. Abi bedquec chēnquetequid utsi-utsiecbidi iquec.

⁴²Aidtedi ēnēdendac. Adecbidi tishac matses unēsacsho chococac nami chodquec. Adec nami chodquian Nuquin Papan tantiapadec uincuentequidēn dada chuca chodquesa nendac. ⁴³Tishac icsaquid matses iquec. Adsho uincuemequin ambi icsaisa icmiaid nendac. Nidaidēnshun tishac chonoadec uimabudquid matses nec. Yuecash unēsacsho uincuemiāc uimabudenquiocquin nabanendac. ⁴⁴Nidaidēnshun tishac daicsambo yanash unēsacsho uincuemequin dada chuca icmetequid nendac. Nidaidēnshun tishac matsesēn tantiapadquid icboedi Nuquin Papan uincuemiāc aidēn tantiapadquid iquendac.

Nidaidēnshun tishac matsesēn tantiapadquid icboedi abuc buanac anocquidēn tantiapadquid iquendac.

⁴⁵Adembidi Nuquin Papan chuiquin dada uamiampid nad iquec: “Bēyuc matses Adan caid nacenashun Nuquin Papan bushcac taēc tiboquequid yampampic.” Nuquin Papan tsyuec chomiaid Esuquidistu nec. Aid tantiaquid abipadquid Nuquin Papan menec. ⁴⁶Nuquin Papan matsesēn tantiapadquidba icmiāc Esuquidistu tantiaquid icsho isun abipadquid meniac icbon tantiapadquid yanec. ⁴⁷Bēyuc matses uanu, qeshun nidaid putu bedshun nacenaid nepampic. Bēyuc matses Adan caidēn tsyuecquid Nuquin Papan abi yacnoshon budmiaid nepanēdash. ⁴⁸Nidaid putu bedshun bēyuc matses nacenashun nidaidēn tabadquid icmepampic. Adquiecbidi abipadquid matsestedi yanac. Nuquin Papan abi yacnoshon Chomiaid tantiaquidtedi aton Mayan menec. Aden meniac abipadquid aido iquendac.

⁴⁹Adecbidi bēyuc matses isadacbmboecquid nidaidēn tabadquidtedi nec. Nuquin Papan abucshun chomiaid isadacbmboecquid abēd icquido iquendac.

⁵⁰Adembidi chuinu. Tantiata. Matsesēn dada nami intacchoquid chodquetequid icnuc Nuquin Papan shubu abentsēquēn tabadtiapimbo adquid iquec. Chodquequid chodquetemaid ictiapimbo iquec.

⁵¹Nuquin Papan chienquiocpampid chuinu. Tantia. Abi tantiaquid unēsabicquidbēdta ēnden abi tantiaquid tsusedpabo dada chuca Nuquin Papan menendac. ⁵²Ambi namiaidēn abucshun shoncanubi ēshē badedquio bēbedquiaicbmboecnuc badedquio unēsesambo Nuquin Papan abi tantiaquido icmendac. ⁵³Chodquetequid icboedi chodquesa yanendac. Unēstequid icboedi unēsesa yanendac.

⁵⁴“Adquid icmiāc unēstequid nibēdquiendac.

⁵⁵Ad icnuc ĩmitsishunquio unēstequid istuidpec? Adembidi, ĩmitsishunquio unēsmetequid istuidpec?”

⁵⁶Icsaquid unēstequid nec. Nuquin Papan nadomboen nata quequin chiaid niacquid icash unēstequid matses yanac.

⁵⁷Adquid nuqui icsho isun Nuquin Papan Nuquin Icbo Esuquidistu chomeshun nuqui cuidenquiocquin aidi icsaisa cuidquin nuqui bēdambo icmebanec. Adoac abi yacnoēsh icsaisa unēsesambo nuqui iquendac. Aden Nuquin Papan naindac, quequin, Bēdambocquid mibi nec, Papa, quequin nuqui chuided-chuidedendac.

⁵⁸Adembidi chuinu. Tantiata. Adenuidi tantiaquin utsi uaquin utsin chuisho tantienquio yec tabad. Adec tabadquin Nuquin Papan chiacpadomboen naban

Esuquidistupadquid Nuquin Papan ëbi icmendac, quequin tantiaquin.

Utsibo menenun piucquid bedbanaid

16 ¹Nuquin Papan bédambo icmebanaid utsibo menenun mimbi piucquid bedbanaid chuiquin dada uaimbique. Isec onquecuedta. Nidaid Cadasia caid yacnocquido Esuquidistu tantiaquido ëmbi chuibanacpadomboen mimbitsen nabanta. Naden Cadasia yacnocquido chiombi.

²Abentsëcshun-abentsëcshunquien mimbi bedaid musucbudcuenshun dominco ushën mimbi musucacted dayun uata. Aton na daëdpactsëc icquidën daëdpactsëc dayun uanubi mitsana dadpen icquidën dadpen dayun uata. Aden musucbudcuenshun mimbi dayun uaid icnuc ëbi choacsho isash, ¿Tedsimbi menepeba? quenquio mibitedi iquendac. ³Ëbi choshombic utsibo bédamboen tantiaquin piucquid dayun uaidtedi mimbi menenun buantan caido isun, Ëmbi isaido neque. Yuedta, quequin dada uashun aido menembi ma buanueshun. Aden ëmbi meniac buanquin utsibo ismetuidpec. ⁴Adecbidi ambo nidtiadquio iquebi, ëbi quenuc mimbi menenun buantan caido ëbëdi nidendac.

Utsi-utsien chuibanaid

⁵Nidaid Masedonia caid yacno Esuquidistu tantiec iccuededquid utsi-utsiec yacno isedbëquimbi mibi isbëtsenembi. ⁶Aden isedbëequi mibi isedash tabadebi. Iquenoanquid chonobi mibëd tabadtsiabi. ¿Aid ënëdan nidnu, quescho, adabi utsi yacno mimbi nidmepatsia? ⁷Nëbi mibëdi yuec tabadtiapimbo iquebi, quiaash mibi yacno nidenquio iquebi. Yuecash mibëdi yuec tabadnuec mibi yacno

nidebi. Nuquin Papa bunuc adendabi. ⁸Nëbi padenquio iquebi. Epeso yacnocquidobëd iquebi. Nuquin Papan abipadquid aton Mayan matses meniaid ushë tantiate choan nëuëshquio nidebi. ⁹Nëmbo Nuquin Papan chiaid tantianu quequid dadpen iquec. Adsho comapenen Esuquidistu chuibanec nebi ma tantiapanueshun. Aden chuibansho tantiauidash utsibo ëbi chieshëncquido nëmbo iquec.

¹⁰Mibi yacno ëbi nidenquio icnubi Timoteyo mibi yacno nideque. Aid bédamboen ista. Pabado yacpadquiocquid Nuquin Papan namiaidquiobidi Timoteyo nec, quec chieshesa icta. ¹¹Nuquin Papan namiaidquiobidi Timoteyo icsho, Ëbëd icquidta nec, quenquiocquin yuedta. Yuedac tabadash, Nidnu, quescho, Ai, nidec nid. Mibi nidsho isash unësqio iquebi, quequin nidme ma ëbi yacno choanu. Utsibobëd Timoteyo choaic quequin cainec tsadebi.

¹²Nëbi nuqui con utsi caid Apodos mibi chuinu. Tanta. Codinto yacno Esuquidistu tantiec iccuededquido nuquin utsibobëdta istanta, quequin Apodos comapenen chiombi. Adoac, Nëbi Codinto yacno nidte bunenquio iquebi, quiosh aid. Yuecash Codinto yacno nidec bédambo ictsiash, quiaash yuecash aidi mibi yacno nidendac.

¹³Icsamane quequin chieshenquiocquin Nuquin Papan chiaid tantiadoneta. Esuquidistu tantiabenquido yanta. Adecbidi, natiateguid icnuc chieshtoenquio yec dayacquo yec tabadteneta. ¹⁴Adec tabadquin utsi bédamboen tantiaquin nabanta.

¹⁵Adembidi chuinu. Tanta. Nidaid Acaya caid yacno Estepanasën shubun icquido abia Esuquidistu tantiaquido icpondash. Adquid yanshun,

Esuquidistu tantiaquid utsibo
 nashumbanquido nuquibi iquendac,
 queshun adobanec. ¹⁶Aidon namiaido
 icta. Adembidi, comapenen
 nashumbanquidtedishun namiaido icta.
¹⁷Codinto yacno Esuquidistu tantiec
 iccuededquidtedi ëbëdi ictiapimbocnobi
 mibi yacnoësh nëidtedi chosh.
 Estepanas yec Podtunato yec Acaico yec
 quec choash puduedsho isash bëdambo
 iquebi. ¹⁸Mibitedi chuibanquin aidon
 unësquiocquidi bëdambo icmioshi. Mibi
 yacno padpidec nidash puduedshun
 chuibanquin adembidi mibitedi
 bëdambo icmendac aidon. Aido mibi
 yacno choacsho isun, Pabado
 chuibanquin mimbi bëdambo
 icmiacpaden nabanec tabadta, quequin
 chuiban.

**Esuquidistu tantiaquidon mibitedi
 tantiaquin chuibanaid**

¹⁹Codinto yacnocquid mibitedi tantiec
 tabadebi, quequin dada uaquin chuita,
 nidaid Asia caid yacno Esuquidistu
 tantiec iccuededquidon cac chiembi.
 Adembidi, Aquidan aton chido

Pidisidabëdtan chui cac chuioaimbi.
 Adembidi, aidon shubun Esuquidistu
 tantiec iccuededquidotedishun chui cac
 adembidi chuioaimbi. ²⁰Aden utsibon
 chiaid chuishumbic, Esuquidistu
 tantiaquid utsibotedibëd bëdamboec
 tabadta, caimbi.

²¹Ëmbi chuibanac ëmbi chiaid utsin
 dada uashumboed nec. Nëshun
 bedanquin dënainquin dada uaimbique.
 Tántia.

²²Nuquin Icbo tantiesa nëbimbobi ma
 Nuquin Papan comapenen cuidquin ma
 nësiatequid icpanuna. Adecbidi abi
 tantiaquido bednuec badedquio
 Esuquidistu chopashun, quec tsadebi.

²³Ëbi icsaquid icsho cuidenquiocquin
 Nuquin Icbo Esuquidistuded Nuquin
 Papan cuidpanëdash, quequin
 tantiaquid nebi, quequin abimbo
 chuiquid ma ambi tantiacpadquid
 Nuquin Papan mibi icmepanuna.

²⁴Esuquidistun shubun icquido
 nuquibi icsho ëmbi bëdamboen isaido
 mibitedi nec.

Padi aited dada uaombique. Isec
 onquecuededta.